

Si₂ a₂chen₄ ne₄ dsa₂
HEBREOS

Ma₂dsia₅ Diú₄ jág₁ quian'₅₄ dsa₂ mi₂güüg₃ tē₂le₃ quian'₅₄ Ja₁ŋi'₅₄

¹ 'Lióng₂ ráun₂ ca₂juá'₂ Diú₄ jág₁ jmi₂g₄ ma₂líg'₂ ca₂tsí'₃ dsa₂ can'₅₄ quián₂ jniog₄, tsá₃ ca₂ne₅₄ jág₁ ca₂'é₂ tē₂le₃ quian'₅₄ dsa₂ i₂ca₂chein₃. ² La₁ jmi₂g₄ jē₁ca₂tó'₂ rē₂né₃ né₃, ma₂ca₂juá'₂ tság₅ jniog₄ tē₂le₃ quian'₅₄ Ja₁ŋi'₅₄ i₂ca₂jmo₃ ca₂le₃jé₃ a₂cha₂ mi₂güüg₃; ján₃ bá₄ o₄gú₃ 'éi₂ ma₂dsia₃ ca₂le₃jé₃. ³ 'Éi₂ bá₄ i₂lín₅ i₂jlán'₁ i₂tág₅ quió'₅ Diú₄; 'éi₂ bá₄ i₂lín₅ nió'₄ tē₂dsón'₂ i₂jáng'₅ léi₄ 'a₂ lia'₂ lín₅ Diú₄. Já₃n bá₄ lín₅ 'éi₂ i₂jmo₅ 'í₁ ca₂le₃jé₃ quian'₅₄ jág₁ bēn₂ quió'₅. Cang₂ jme₁ca₂rín'₃ 'éi₂ dsáu₁ jniog₄, jaun₂ ca₂guá₂ guei'₅₄ i₂juíg₃ con₂ Diú₄ tē₂le₃ gu₂ ne₁ ne₄ta₁ quió'₅.

Ja₁ŋi'₅₄ Diú₄ bá₄ i₂juin'₂ gué₄ lia'₂ con'₂ gué₄ ángeles

⁴ Ma₂ca₂lín₃ Ja₁ŋi'₅₄ Diú₄ i₂juin'₂ gué₄ lia'₂ con'₂ gué₄ ángeles, ia₁ ma₂gue₃ quió'₅ jmei₂ a₂ma₂lín₅ ta₁ a₂dsen₅₄ gué₄ lia'₂ con'₂ gué₄ ángeles.

⁵ Tsá₃ líg'₂ ca₂juá'₂ Diú₄ ca₂tsí'₃ ángeles quiáin₅ 'i₁jan₂ le₂la₂:

Lín'₅ 'ne₂ chi'₂-guein₂ quiáng₃;

jmi₂g₄ ně₃ ma₂lín₅ jniá₂ ŋéi'₅.*

On₃ gué₄ 'i₁jan₂ ángel tsá₃ ca₂'iin₃ jua'₅₄ a₂juá'₂ le₂la₂:

Lén₂ jniá₂ jmei₂ 'éi₂,

'éi₂ gué'₂ lén₂ chi'₂-guein₂ quiáng₃.†

* 1:5 Salmo 2:7. † 1:5 2 Samuel 7:14.

6 La₁ ja₁siá'₂ né₃, lia'₂ con'₂ jme₁ca₂o₃jniai₃ Ja₁ŋi'₅₄ i₂ne₅₄
mi₂güüg₃, jaun₂ juá'₂:

Jui₁jme₂juag'₂ ca₂le₃jín₃ ángeles quián₅ Diú₄.‡

7 Jui₁lia'₂ të₂le₃ quió'₅ ángeles guè'₂ juá'₂:

Jmo₅ Diú₄ a₂lín₅ ángeles co₂'nió'₄ dsí₂,

jmo₂₃ a₂lín₅ i₂jme₂ti₃ ne₅₄

co₂'nió'₄ le₁tsi'₅₄ si₂.§

8 La₁ jui₁lia'₂ të₂le₃ quió'₅ Ja₁ŋi'₅₄ né₃, juá'₂:

Jiog₅ ca₂le₃jé₃ jmig₄ ne₄ta₁ quián'₂ 'ne₂,

Diú₄ quiáng₃.

Quian'₅₄ jág₁ tí₅* qui₂dsí'₁ 'ne₂ 'éi'₃.

9 A₂'niog'₂ 'ne₂ a₂tí₅, a₂'ŋia'₅₄ 'ne₂ a₂'lig'₅₄;

'Uig₅₄ jaun₂, Diú₄ né₃, Diú₄ quiáng'₂,

ma₂ca₂chein'₃ 'ne₂

ne₄ jui₅ quió'₅ ca₂le₃jín₃ ríng'₂,

ca₂jmo₃ Diú₄ a₂rë₂rín₅ 'au'₂ a₂jmo'₂ 'io'₂.†

10 Ján₃ bá₄ juá'₂:

Lia'₂ ne₁, 'ne₂ Te₁gui'₅₄ quiáng₃,

ca₂jmo'₅₄ 'uig₅₄ tag₄ mi₂güüg₃;

guei'₅₄ i₂juüg₃ guè'₂ né₃,

ta₁ a₂ca₂lë₃ quian'₅₄ gog'₂ bá₄ jaun₂.

11 A₂dsi₃ŋí₂ ca₂le₃jé₃ a₂në₅,

la₁ 'ne₂ né₃, con'₂ tan₅₄ bá₄ lín'₅ 'ne₂;

rë₃'áu₂ a₂jaun₂ jui₁lia'₂ ni₁tsin'₅₄ dsa₂.

12 A₂jóng'₅ a₂jaun₂ jui₁lia'₂ jë₁jón'₂ dsa₂ tsi₁'mi'₂.

La₁ 'ne₂ né₃, lia'₂ ma₂lín'₅ jaun₂ bá₄ 'ne₂.

Tsá₃ o₁líg'₂ jmig₄ dsiá₃ a₂chan'₂ 'ne₂.‡

13 Tsá₃ líg'₂ ca₂juá'₂ Diú₄ ca₂tsí'₃ 'i₁jan₂ ángel le₂la₂:

‡ 1:6 Deuteronomio 32:43. § 1:7 Salmo 104:4. * 1:8 lit. “Quian'₅₄
'ma₂'i₅₄ dsau.” † 1:9 Salmo 45:6-7. ‡ 1:12 Salmo 102:25-27.

Né₂ con₂ jniá₂ të₂le₃ gu₃ ne₁,
 ca₂lia'₂ ca₂té₂ jmi_g₄
 a₂tón'₁ jniá₂ dsa₂ i₂'iog₅₄ o₄tag'₄.§
¹⁴ Ia₁ lín₅ ángeles jme₂dsí₂ i₂jme₂'o₅₄ i₂chen₄ a₂jme₂ti₃
 ta₁ ne₄ i₂ca₂tín₂ gue₃ a₂lió₂ Diú₄.

2

Tion₅₄ 'nió'₅ tón'₂ dsa₂ jui₅

¹ 'Uig₅₄ jaun₂ bá₄ tion₅₄ niog₅ tion'₂ jniog₄ jui₅ 'nio₅
 lín₃ gué₄, jág₁ a₂ma₂néi₁ jniog₄, ia₁jaun₂ tsá₃ qui₂dsi₃cón'₅
 jniog₄ jui₅.

² Ia₁ chi₂jua'₂ tion₅₄ jme₁jme₂ti₃ dsa₂ 'éi'₃ jaun₂
 a₂ca₂quiog₂ Diú₄ ma₂líg'₂ të₂le₃ quian'₅₄ ángeles quiáin₅,
 jaun₂ chi₂jua'₂ qui₂ca₂gue₃ dsa₂ uig₅ 'a₂ con'₂ ca₂tín₂
 jme₁ca₂'náu₂ dso₄, ³ ¿'a₂ bá₄ lia'₂ lé₂ le₃lió₂ jniog₄ nē₁jua'₂
 tsá₃ tion'₂ jniog₄ jui₅ jág₁ a₂ñí₄ lē₃ quen₅ a₂lió₂ jaun₂?
 Ia₁ 'niog₅ bá₄ Te₁gui'₅₄ 'éi₂ i₂ca₂juá'₂ le₂'uig₅₄ jág₁ a₂lió₂
 jaun₂. Jaun₂ gué₄ qui₂ca₂cuē₃ jág₁ dsau₅ tság₅ jnia'₅₄ dsa₂
 i₂ca₂nág₂.

⁴ Já₃ bá₄ ca₂cuē₃ Diú₄ jág₁ dsau₅ të₂le₃ quian'₅₄ léi₄
 a₂dsi₃gó'₃ dsí₅ dsa₂ ca₂jmo₃ 'lióng₂ ráun₂, já₃ bá₄ të₂le₃
 quian'₅₄ Jme₂dsí₂ Jñió₅ i₂ma₂qui₂ma₂cuin₃ jniog₄ le₂jau₂
 le₂jau₂ lia'₂ con'₂ lé₅ a₂'nio₃ 'éi₂.

Ca₂lín₃ Jesús lia'₂ lín₅ riin'₅₄

⁵ On₃jua'₅₄ o₄gú₃ ángeles ca₂dsia₃ mi₂güüg₃ a₂já₅, a₂'ē₂
 jnia'₅₄.

⁶ La₁ia₁ cha₂ bá₄ caun₂ ja₁ma₂cuē₅ dsa₂ jág₁ dsau₅ le₂la₂;
 ¿I₂'ein₂ bá₄ dsa₂ mi₂güüg₃,
 a₂ñí₄ lē₃ dsau'₂ 'au'₂ 'éi₂?

§ 1:13 Salmo 110:1.

ʔI₂'ein₂ bá tsi₁jon₂ dsa₂ mi₂güüg₃,
a₂ñí₄ lë₃ tón'₂ 'ne₂ jui₅ 'éi₂?

⁷ Ca₂jmoi'₅₄ ca₂tiá₂ mei'₂ gué₄
con'₂ gué₄ ángeles quiáng'₂;

la₁ ma₂ca₂jme₃juin'₂, ma₂ca₂jmo'₅₄ a₂lín₅ i₂dsen₅₄ gué₄,
[ca₂dsiain'₅₄ a₂nio₃ gu₂ a₂ca₂jmo'₅₄ 'ne₂ quian'₅₄
gog'₂]*

⁸ ma₂dsia'₅₄ 'ne₂ ca₂le₃jé₃ o₄tag₁₂.†

Jaun₂ né₃, jme₁ca₂dsia₃ Diú₄ ca₂le₃jé₃ o₄tag₄ dsa₂
mi₂güüg₃, tsá₃ ma₂'e₂ cha₂jua'₅₄ a₂tsá₃ niog₅ gu₂ 'éi₂. La₁ia₁
rë₂né₃ né₃, tsá₃ ma₂léi₄ gué₄ a₂niog₅ gu₂ 'éi₂ le₃jé₃.

⁹ La₁ia₁ jin₄ bá jniog₄ Jesús i₂ca₂lín₃ ca₂tiá₂ mei'₂ gué₄
con'₂ gué₄ ángeles, ca₂rë₃juin'₂, ca₂lín₃ i₂dsen₅₄ gué₄ né₃
ia₁ ca₂i₃ñí₂ uig₅ ne₄ 'mú₃, ia₁jaun₂ le₃cuí'₅ 'mú₃ o₄quió'₄
ca₂le₃jín₃, ia₁ a₂'ua₁ dsí₅ Diú₄.

¹⁰ Quió'₅ Diú₄ bá le₃jé₃; tē₂le₃ quian'₅₄ 'éi₂ ca₂lë₃ le₃jé₃.
Jaun₂ 'nio₃ Diú₄ chóin'₂ ca₂le₃jín₃ chi'₂-guein₂ quiáin₅,
a₂lén₂ 'éi₂ jláin'₁ co₂lë₅ quiain'₅₄. 'Uig₅₄ jaun₂, dsi₂ten₅₄ bá
a₂ca₂jme₃ 'ñia₅ Diú₄ ca₂jme₃ 'ñiai₂₃ Jesucristo tē₂le₃ quian'₅₄
jmi₁uig₅ a₂ca₂i₃ñí₂ jme₁ca₂niá₃ jui₅ a₂lióin₂ 'éi₂.

¹¹ Ia₁ jui₁lia'₂ i₂jme₂jñi₃ quian'₅₄ i₂rë₂jñi₃ né₃, jan₂ bá
Jmei₂ chan₂. 'Uig₅₄ jaun₂, tsá₃ gui'₅₄ Ja₁ñi'₅₄ Diú₄ té'₂ dsa₂
'éi₂ riin'₅₄.

¹² Le₂la₂ juá'₂ ne₄ si₂;

'ín₄ jniá₂ 'ne₂ jin₄ ríng'₃,
te₂jë₄ ja₁le₁ñi'₂ dsa₂

'ë₅₄ jniá₂ son₅₄ a₂jme₁juag'₂ quiáng'₂.‡

* 2:7 Chog₅₄ si₂ a₂dse₃ gué₄ tsá₃ le₁ton₅ jág₁ a₂tio'₅₄ 'ñi₃
corchetes [le₂la₂]. † 2:8 Salmo 8:4-6. ‡ 2:12 Salmo 22:22.

13 Ján₃ bá₄ juá'₂:

Caun₂ bá₄ 'ag₁₂ dsi₃ ja₁con₂ 'éi₂.§

Con'₂ siá'₂ táng₃ juá'₂;

ja₁lá₃ bá₄ chén'₅ jniá'₂,

ca₂lia'₂ ma₂quian'₅₄ chi'₂-guein₂

i₂ma₂cuin₃ Diú₄ jniá'₂.*

14 Jui₁lia'₂ ca₂tín₂ chi'₂-guein₂ jan₂ chog₅₄-jmei₂ dsa₂ mi₂güüg₃ caun₂ jmi₂ 'ain₅₄, ján₃ bá₄ le₂në₅ ca₂tín₂ Jesús caun₂ jmi₂ 'ain₅₄ quian'₅₄ dsa₂ mi₂güüg₃, ia₁jaun₂ të₂le₃ quian'₅₄ 'mú₃ quió'₅ lé₂ le₃lí'₂ ne₄ 'éi₂ i₂'io₅ bí₂ quió'₅ 'mú₃, co₂'nió'₄ le₃jua'₅₄ i₂së₃dsen₃.

15 Ján₃ bá₄ le₂jaun₂ ca₂jmo₃ ia₁jaun₂ lé₂ le₃qui₂le₃chen'₂ dsa₂ i₂në₂jag₄ bá₄ i₂qui₂rë₂'he'₅₄, ia₁ ca₂le₃jé₃ jmi₂g₄ a₂chain₂, gó'₅ 'mú₃ quió'₅.

16 Ia₁ dsón'₂ bá₄ on₃jua'₅₄ jaun₂ ca₂guain₃ jua'₅₄ a₂jme₃'oin₅₄ ángeles; ta₁ jaun₂ bá₄ ca₂guain₃ a₂jme₃'oin₅₄ tsi₁jon₂ Abraham.

17 'Uig₅₄ jaun₂, tion₅₄ bá₄ ca₂liin₃ ca₂le₃jé₃ jui₁lia'₂ lín₅ dsa₂ mi₂güüg₃ riin'₅₄, ia₁jaun₂ dsióg₄ léin₂ jan₂ jme₂dsa₂ dsen₅₄ i₂hëi₂ dsi'₅, i₂rë₂ti'₅₄ né₃, ia₁jaun₂ jniá'₂ dsáu₁ dsa₂ të₂le₃ quian'₅₄ a₂jéin'₂ ne₄ Diú₄.

18 Jaun₂ jui₁lia'₂ ca₂hág₃ uig₅ 'éi₂ jme₁ca₂caun₃ Diú₄ táu₂, ján₃ bá₄ le₂në₅ qui'₅₄ jmi₂g₄ jme₃'oin₅₄ jui₁lia'₂ dsa₂ i₂caun₂ dsa₂ táu₂.

3

Jesús bá₄ i₂dsen₅₄ gué₄ con'₂ gué₄ Moisés

1 Le₂jaun₂ 'nia'₂ rin'₅₄ jniog₄ i₂ma₂rë₂tson₄ quián₅ Diú₄, 'nia'₂ i₂ca₂tín₂ të₂ Diú₄ guei'₅₄ i₂juíg₃, dsiog'₂ 'au'₂ 'nia'₂

§ 2:13 Isaías 8:17. * 2:13 Isaías 8:18.

Cristo Jesús i₂chen₄ quián₅ Diú₄, ján₃ bá₄ i₂lín₅ jme₂dsa₂
dsen₅₄ i₂'ín₅ jniog₄.

² 'ŋiog₅ Jesús ma₂ca₂rë₃ti'₅₄ ja₁con₂ Diú₄ i₂ca₂'ag₃ a₂jmo₃
ta₁ në₅, jui₁lia'₂ ca₂jme₃ti₃ Moisés con'₂ ta₁ jme₁chéin'₄
ja₁con₂ ca₂le₃jín₃ chi'₂-guein₂ quián₅ Diú₄.

³ La₁ia₁ ca₂tín₂ Jesús jme₃juag'₂ dsa₂ con'₂ gué₄ Moisés,
jui₁lia'₂ quen₅ gué₄ dsa₂ i₂jmo₅ 'né₅ con'₂ gué₄ tsi₁'né₅
'ŋiog₅.

⁴ Jui₁lia'₂ caun₂ 'né₅, tion₅₄ bá₄ chan₂ i₂jmo₃; la₁ 'ŋiog₅
bá₄ Diú₄ ca₂jmo₃ ca₂le₃jé₃ 'e₂ a₂cha₂.

⁵ Ca₂jme₃ti₃ Moisés ja₁con₂ ca₂le₃jín₃ chi'₂-guein₂ quián₅
Diú₄, con'₂ ta₁ a₂jme₁lín₄ ne₄ Diú₄, qui₂ca₂jáng'₃ jág₁ dsau₅
jui₁lia'₂ jág₁ quió'₅ Diú₄ a₂jme₁juá'₂.

⁶ La₁ia₁ Cristo né₃, rë₂ti'₅₄ bá₄ a₂lín₅ Ja₁ŋi'₅₄ Diú₄ i₂chén'₅
ne₄ ca₂le₃jín₃ chi'₂-guein₂ quián₅ Diú₄. Chi'₂-guein₂ 'éi₂
lág₅ jniog₄ guio₅₄ në₁jua'₂ chan'₂ jniog₄ tiá₂ a₂caun₂ 'ei₅
dsi₅ jniog₄, jmo₂ jniog₄ 'io'₂, ia₁ cha₂ a₂'ín₂ dsi₅ jniog₄ tag₃;
a₂jaun₂ bá₄ 'io'₂ jein₂ jniog₄.

⁷ 'Uig₅₄ jaun₂, lé₅ jui₁lia'₂ juá'₂ Jme₂dsí₂ Jŋiós ne₄ si₂:
Jmíg₄ në₃ në₁jua'₂ nag'₂ 'nia'₂ jág₁ quió'₅ Diú₄,

⁸ Tsá₃ lë₁jme₂'uá'₂ 'nia'₂ 'au'₂
jui₁lia'₂ ca₂jmo₃ i₂lín₅₄ ca₂nau₂ 'nei₂
ca₂cain₃ táu₂ Diú₄ 'uë₃ co₂'ŋiog₅ jaun₂.

⁹ Ja₁jaun₂ ca₂caun₃ táu₂ jniá₂
dsa₂ can'₅₄ quián'₂ 'nia'₂ ma₂líg'₂,
o₁jŋia'₅₄ ma₂qui₂ma₂jág₃ ta₁ quió₃
ma₂të₂láu₃ ŋi₂.

¹⁰ 'Uig₅₄ jaun₂ ca₂jén₂ dsi₃
quian'₅₄ dsa₂ i₂jme₁chan₂ jmíg₄ jaun₂,
jaun₂ ca₂juá'₃ jniá₂:

“Con'₂ tan₅₄ bá₄ i₂nio₄ dsa₂ në₅

qui₂dsi₂cón'₅ dsí'₅,
tsá'₃ 'nio₃ le₃cuí'₅ jui₅ quió'₃.”

¹¹ Uig₅₄ jaun₂ ca₂'ín₃ jniá'₂ 'ñió'₃
jme₁ca₂'í'₃ 'nei₂ dsi₃,

a₂tsá'₃ dsi₁len₃ 'éi₂

jua'₅₄ a₂jñia₃ ja₁con₂ jniá'₂.*

¹² Rin'₅₄ jniog₄, jmo₄ 'nia'₂ 'í₁ ia₁jaun₂ 'i₁jan'₂ 'nia'₂ tsá'₃
le₃'ua'₂ dsí'₅, jua'₅₄ a₂'nio₃ náu₃ cau₅ ja₁con₂ Diú'₄ jén'₃ ia₁
tsá'₃ 'éin₂ jág₁ quió'₅.

¹³ Tē₂le₃ cuē'₅₄ 'nia'₂ bí₂ ríng'₂ le₂jang'₂ le₂jang'₂ lia'₂
caun₂ jmi₄, tē₁lia'₂ jiog₅ “jmi₄ nē₃” a₂ma₂juá'₂ Si₂,
ia₁jaun₂ 'i₁jan'₂ 'nia'₂ tsá'₃ le₃'ua'₂ 'au'₂ tsá'₃ le₃gan'₂ 'nia'₂
quian'₅₄ dso₄.

¹⁴ Ia₁ i₂ma₂quián₅ Cristo bá₄ jniog₄, nē₁jua'₂ ca₂tián₃
jniog₄ tē₂jē₁ca₂tó'₂ caun₂ bá₄ 'ei₅ dsi₅ jniog₄ jág₁ quió'₅ lia'₂
con'₂ lé₅ jme₁ca₂rē₃ 'éin₂ le₂'uig₅₄.

¹⁵ Jui₁lia'₂ ma₂nē₂juá'₂:

Jmi₄ nē₃, nē₁jua'₂ ca₂nei'₂ 'nia'₂
jág₁ quió'₅ Diú'₄,

tsá'₃ jme₁'ua'₂ 'nia'₂ 'au'₂,

jui₁lia'₂ ca₂jmo₃ i₂lín₅₄

ca₂nau₂ 'nei₂ ne₄ Diú'₄.†

¹⁶ ¿'Ein₂ 'éi₂ i₂ca₂nág₂ jág₁ quió'₅ Diú'₄ jaun₂ ca₂nau₂ 'nei₂
cang₂ jaun₂? Ca₂le₃jín₃ dsa₂ i₂ca₂'uín'₂ Moisés 'uē₃ Egipto,
i₂'éi₂ bá₄.

¹⁷ ¿'Ein₂ quian'₅₄ ca₂rē₃'né₃ Diú'₄ con'₂ tē₂láu₃ ñi₂?
Quian'₅₄ dsa₂ i₂ca₂'náu₂ dso₄ bá₄, i₂ca₂dsan₃ 'uē₃ co₂'ñiog₅
jaun₂.

* 3:11 Salmo 95:7-11. † 3:15 Salmo 95:7-8.

18 ¿Ja₁con₂ 'ein₂ ca₂cuë₃ Diú₄ jág₁ quió'₅ a₂tsá₃ dsi₁lein₃ jua'₅₄ jñia₃ quiong'₅₄? Ja₁con₂ dsa₂ i₂tsá₃ ca₂nág₂ gau₂ jág₁ quió'₅ bá₄. ‡

19 Jaun₂ ne₄ jniog₄, le₂jaun₂ bá₄ ca₂i₃ñí₂: tsá₃ a₁jaun₂ ca₂i₃toin'₅₄, 'uig₅₄ ia₁ a₂tsá₃ ca₂rë₃'éin₂.

4

1 'Uig₅₄ jaun₂, të₁lia'₂ ron₅ gué₄ jág₁ a₂ma₂cuë₃ Diú₄ a₂dsi₁no₃ jniog₄ ja₁dsi₁jñia₁ ja₁coin₂, 'nió'₅ jmó₁ jniog₄ 'í₁ con'₂ tsá₃ njó₅ në₁jua'₂ 'ein₂ 'nia'₂ tsá₃ ca₂tíng'₂ ja₁jaun₂.

2 Ia₁ ján₃ bá₄ le₂jaun₂ ma₂ca₂rë₃'é₂ jág₁ a₂lió₂ ja₁con₂ jniog₄ jui₁lia'₂ ma₂ca₂rë₃'é₂ ja₁con₂ 'éi₂; la₁ia₁ tsá₃ ta₁ ca₂jmo₃ co₂ñí₂ a₂ca₂nág₂ jág₁, 'uig₅₄ ia₁ a₂tsá₃ ca₂'an₂ dsí₅ jág₁ jaun₂ jua'₅₄ a₂ca₂rë₃'éin₂.

3 La₁ jniog₄ i₂ma₂ca₂rë₃'éin₂ né₃, dsi₁no₃ bá₄ jniog₄ dsi₁jñia₁₂ ja₁jaun₂ jui₁lia'₂ a₂ma₂juá'₂ Diú₄:

'Uig₅₄ jaun₂ ca₂'ín₃ jniá₂ 'ñió₃,

jme₁ca₂'í₃ 'nei₂ dsi₃,

a₂tsá₃ dsi₁len₃ 'éi₂

jua'₅₄ jñia₃ ja₁con₂ jniá₂.*

La₁ia₁ ma₂ca₂'ió'₃ ta₁ quió'₅ Diú₄ ca₂le₃ ca₂'nio₃ mi₂güí₃.

4 Ia₁ cha₂ ja₁juá'₂ ne₄ Si₂ le₂la₂, a₂'ë₂₃ jë₁ca₂té₂ guio₃ jmig₄: “Ca₂jñia₃ Diú₄ jë₁ca₂té₂ guio₃ jmig₄, jme₁ca₂lë₃ ca₂lejé₃ ta₁ quió'₅.” † 5 Con'₂ siá'₂ táng₃ juá'₂ ne₄ Si₂: “Tsá₃ dsi₁lein₃ jua'₅₄ a₂jñia₃ ja₁con₂ jniá₂.”

6 La₁ jui₁lia'₂ chan₂ i₂lín₅₄ i₂'nió'₅ tón'₃ ja₁jaun₂, i₂sián'₂ gué'₂ tsá₃ ca₂i₁tion'₅₄ le₂jñiá₅ jme₁ca₂nág₂ jág₁, 'uig₅₄ ia₁ a₂tsá₃ ca₂rë₃'éin₂, 7 con'₂ siá'₂ ca₂tióng₃ Diú₄ caun₂ jmig₄

‡ 3:18 'Nio'₂ ja₁ton₅ Números 14:22-23. * 4:3 Salmo 95:11; ján₃ bá₄ le₂në₅ † 4:4 Génesis 2:2.

ca₂juá'₂ tē₂le₃ quian'₅₄ David 'lióng₂ ŋi₂ cang₂ jaun₂ ca₂té'₃
 “jmi_g₄ nē₃” jme₁ca₂juá'₂ ne₄ Si₂ já_g₁ a₂ma₂ca₂juá'₂ le₂jñiá'₅:
 Jmi_g₄ nē₃ nē₁jua'₂ ca₂nei'₂ 'nia'₂ já_g₁ quió'₅ Diú₄,
 tsá₃ lē₁jme₂'uá'₂ 'nia'₂ 'au'₂.[‡]

⁸ Ia₁ jua'₅₄ mei'₂ gué'₃ Josué ca₂cuē₃ caun₂ ja₁jñia₃ dsa₂,
 tsá₃ jaun₂ jme₁juá'₂ Diú₄ cang₂ jaun₂ jme₁'ē₃ jmi_g₄ siá'₂.

⁹ Jaun₂ lē₃, lia'₂ ma₂cha₂ jaun₂ bá₄ jmi_g₄ sa₅₄ ja₁jñia₅ dsa₂
 juig₂ quián₅ Diú₄. ¹⁰ Ia₁ jui₁lia'₂ ca₂jñia₃ Diú₄ ta₁ quió'₅
 a₂ca₂jmo₃, já_n₃ bá₄ le₂jaun₂ jui₁lia'₂ i₂dsi₃ton'₅₄ dsi₃jñia₅₄
 ja₁con₂ Diú₄, tí₂ ta₁ quió'₅, jñia₃.

¹¹ 'Uig₅₄ jaun₂ 'nió'₅ 'niog'₅₄ jniog₄ jui₅ a₂quen'₂ bí₂
 a₂dsi₁no₃ ja₁jaun₂, ia₁jaun₂ 'i₁jan₂ tsá₃ 'ein₂ tián'₃ a₂cán₂
 jui₅ a₂ca₂i₁nio₄ 'éi₂ a₂tsá₃ ca₂nág₂ gau₂ já_g₁ quió'₅ Diú₄.

¹² Ia₁ jén'₃ bá₄ já_g₁ quió'₅ Diú₄, 'io₅ bí₂ né₃, 'ñio₅
 chen'₂ con'₂ gué'₄ caun₂ ŋi₁tág₂ 'mu₃ le₃tin₃ ton₂, dsi₂tia₃
 ca₂tē₂ né'₃ jmo₅ le₁dso'₅₄ tē₂dsí'₅ dsa₂ quian'₅₄ jme₂dsí'₂,
 jmo₅ le₁dso'₅₄ ja₁jón'₅ quian'₅₄ dsí'₅ ni₁mu₅ né₃, jme₂jñia₅
 ca₂le₃jé'₃ 'e₂ dsi₂jniog₅ dsí'₅ dsa₂, ca₂le₃jé'₃ 'a₂ lia'₂ lín₂ dsa₂
 né₃.

¹³ Ca₂lia'₂ 'i₁caun₂ a₂ca₂jmo₃ Diú₄ tsá₃ lé₂ le₃'má₂ ne₄ 'éi₂;
 ca₂le₃jé'₃ bá₄ rē₂jñiá₂ rē₂na₄ ne₄ i₂dsi₁jang'₅₄ jniog₄ cuenta
 quián₂.

Lín₅ Jesús Jme₂dsa₂ Dsen₅₄ i₂juin'₂

¹⁴ Jaun₂ né₃, jme₂dsa₂ dsen₅₄ i₂juin'₂ quián₂ jniog₄ lín₅
 Jesús, Ja₁ñi'₅₄ Diú₄, i₂ca₂uig₂ guei'₅₄ i₂juig₃. 'Uig₅₄ jaun₂
 'nió'₅ caun₂ chan'₅₄ jniog₄ tiá₂ já_g₁ a₂'éin₂ jniog₄.

¹⁵ On₃jua'₅₄ a₂tsá₃ lé₂ dsia₃ ñéi'₂ dsí'₅ jme₂dsa₂ dsen₅₄
 quián₂ jniog₄ jē₁ma₂ca₂'uá₂ jniog₄. Ia₁ ma₂ca₂caun₃ dsa₂

[‡] 4:7 Salmo 95:7-8.

ca₂le₃jé₃ táu₂ quió'₅, jui₁lia'₂ cáun₂ dsa₂ táu₂ jniog₄, la₁ia₁ tsá₃ dso₄ ca₂'náu₂ 'éi₂.

¹⁶ Jaun₂ né₃ ma₃ jme₁quián₄ jniog₄ caun₂ bá₄ 'ei₅ dsi₅ ca₂të₂ ne₄ta₁ ja₁guá₄ Diú₄ i₂'ua₁ dsí₅, ia₁jaun₂ dsia₃ 'éi₂ ηéi₂ dsí₅, a₂jme₃'o₅₄ a₂'ua₁ dsí₅ jë₁ma₂ca₂rë₃'nió'₅ quián₂ jniog₄.

5

¹ I₂rë₂quion'₅₄ jin₄ dsa₂ mi₂güüg₃ bá₄ le₂jan₂ le₂jan₂ jme₂dsa₂ dsen₅₄ a₂rë₂'iin₄ a₂chéin'₅ ne₄ jág₁ o₄quió'₄ dsa₂ mi₂güüg₃ ne₄ Diú₄ ia₁jaun₂ jén'₃ jui₁lia'₂ 'e₂ 'nió'₅ jén'₃, a₂qui₃dsiin'₂ já'₂ né₃ o₄quió'₄ dsáu₁ dsa₂.

² Jaun₂ jui₁lia'₂ jme₂dsa₂ le₂'éi₂, ján₃ bá₄ liin₅ dsa₂ mi₂güüg₃ a₂'uain₅₄; lé₂ bá₄ jme₃'ua₁ dsí₅ ja₁con₂ jui₁lia'₂ dsa₂ i₂tsá₃ ηi₅, jui₁lia'₂ dsa₂ i₂ma₂i₂nio₄ cau₅ jui₅ né₃.

³ 'Uig₅₄ ia₁ a₂liin₅ dsa₂ mi₂güüg₃ 'uain₅₄, tion₅₄ 'nió'₅ jén'₃ ne₄ Diú₄, lia'₂ o₄quió'₄ dsáu₁ 'ηiog₅ lia'₂ o₄quió'₄ dsáu₁ dsa₂ jui₂ táng₃.

⁴ 'I₁jan₂ tsá₃ lé₂ le₃lén₂ ta₁ jué'₂ jaun₂ jua'₅₄ a₂le₃'iin₃ 'ηiog₅; tion₅₄ bá₄ 'nió'₅ 'ag₃ Diú₄ jui₁lia'₂ ca₂'iin₃ Aarón.*

⁵ Ján₃ bá₄ le₂në₅ lé₅ quian'₅₄ Cristo. Tsá₃ ca₂jme₃juiin'₂ 'ηiog₅ jua'₅₄ ca₂'iin₃ 'ηiog₅ a₂lén₂ jme₂dsa₂ dsen₅₄; Diú₄ bá₄ ca₂'ag₃ ta₁ jué'₂ jaun₂. Jaun₂ ca₂juá'₂ Diú₄:

Lín'₅ 'ne₂ chi'₂-guein₂ quiáng₃;

Jmig₄ në₃ ma₂lín₅ jniá₂ ηéi'₅.†

⁶ Ján₃ bá₄ le₂në₅ juá'₂ ja₁siá'₂ táng₃:

Lín'₅ 'ne₂ jme₂dsa₂ con'₂ tan₅₄,

ca₂ne₅₄ lia'₂ jme₁lín₄ Melquisedec.‡

⁷ Lia'₂ con'₂ jme₁chan₂ Jesús mi₂güüg₃ la₂, ca₂mi₃ tiá₂ ne₄ Diú₄ Jmei₂, ca₂'o₃ a₂jme₁mi₂₃ tion₅₄ ne₄ 'éi₂ i₂'io₅ bí₂

* 5:4 Aarón: 'Nio'₂ ja₁ton₅ Éxodo 4:14. † 5:5 Salmo 2:7. ‡ 5:6 Salmo 110:4.

a₂jme₁lió₂ ne₄ 'mú₃. Jaun₂ Diú₄ nē₃ ca₂nág₂ bá₄ quió'₅, 'uig₅₄ ia₁ a₂ca₂nág₂ gau₂ jág₁ quió'₅ 'éi₂.

⁸ O₁jñia'₅₄ jme₁lín₄ Ja₁ñi'₅₄ Diú₄, ca₂rē₃tíin₃ a₂nag₃ gau₂ tē₂le₃ quian'₅₄ uig₅ a₂ca₂i₃ñí₂.

⁹ Jaun₂ jme₁ca₂rē₃'ñia₅ quió'₅, jaun₂ gué₄ ca₂lín₃ 'uig₅₄ ja₁lión₂ co₂tan₅₄ ca₂le₃jín₃ i₂nag₅ gau₂ jág₁ quió'₅, ¹⁰ ia₁ Diú₄ bá₄ ca₂'ag₃ a₂lén₂ jme₂dsa₂ dsen₅₄ ca₂ne₅₄ lia'₂ jme₁lín₄ Melquisedec.

Go'₂ nē₁jua'₂ ca₂tí₂ dsa₂ a₂'éin₂

¹¹ 'Lióng₂ bá₄ jág₁ le₂nē₅ cha₂ a₂'nió'₅ jua'₅₄ jnia'₅₄, la₁ia₁ quian₅ ta₁ jua'₅₄ a₂jme₁tin₅ jnia'₅₄ 'nia'₂ jág₁ nē₅, ia₁ a₂ca₂lín'₃ 'nia'₂ cang₄ dsei'₂.

¹² Ma₂líg'₂ bá₄ ca₂rē₃'én'₂ 'nia'₂ jág₁; rē₂nē₃ le₃jua'₅₄ a₂ma₂ca₂tíng'₂ 'nia'₂ léng'₂ tē₅. La₁ tion₅₄ bá₄ 'nió'₅ jme₃tag₅ táng₃ dsa₂ quian'₅₄ 'nia'₂ jág₁ 'ua₁ le₂'uig₅₄ quió'₅ Diú₄, nē₂jag₄ bá₄ a₂'nió'₅ 'ag'₅₄ 'nia'₂ jmá'₃ dsi'₅₄, 'nió'₄ a₂jme₁quíg'₂ 'nia'₂ ñí₅.

¹³ Jaun₂ jui₁lia'₂ dsa₂ i₂'ín'₂ jmá'₃ dsi'₅₄, lín₅ jui₁lia'₂ lín₅ guein₂ i₂tsá₃ lín₄ tin₂ jág₁ quió'₅ jui₅ co₂dsau₅.

¹⁴ Jui₁lia'₂ má₃ quió'₅ dsa₂ can'₅₄ nē₃, lé₅ jmá'₃ quió'₅ dsa₂ ma₂ron₂, quió'₅ dsa₂ i₂ma₂'en₅₄ dsí₅ i₂ca₂rē₃tín₃ i₂ca₂rē₃ñi₅ na₂ jui₅ dse₃, na₂ jui₅ 'lig'₅₄ 'e₂.

6

¹ Jaun₂ nē₃, jui₁dsiá₁ jniog₄ cau₅ jág₁ le₂'uig₅₄ quió'₅ Cristo a₂ma₂ca₂jme₁tag₅ jniog₄. Ma₃dsau₅₄ jniog₄ ne₄ jui₅ ia₁jaun₂ lén₂ jniog₄ dsa₂ ma₂ron₂. Tsá₃ ma₂'nió'₅ jua'₅₄ a₂quián₂ táng₃ jniog₄ 'uig₅₄ jág₁ jui₁lia'₂ jē₁jme₂tsín₃ dsa₂ dsí₅ a₂tsá₃ ma₂jmo₂₃ jui₁lia'₂ a₂jniog₂₃ jui₅ 'mú₃, jui₁lia'₂ 'a₂ lia'₂ rē₂'én₂ dsa₂ jág₁ quió'₅ Diú₄ nē₃; ² tsá₃ ma₃'nió'₅ jua'₅₄

caun₂ jme₁tag₅ jniog₄ jui₁lia'₂ a₂chon₅ dsa₂ jmig₂, jui₁lia'₂ a₂quiog₂ dsa₂ gu₂ ne₄ quió'₅ dsa₂, jui₁lia'₂ a₂jen'₅₄ dsa₂ jin₄ 'lag₄, on₃ gué₄ jui₁lia'₂ a₂qui₃dsi₅ Diú₄ 'éi'₃ co₂tan₅₄ né₃.

³ Le₂jaun₂ jmó₁ bá₄ jniog₄, a₂dsau₅₄ ne₄ jui₅, chi₂jua'₂ jme₃'o₅₄ Diú₄.

⁴ Ia₁ jui₁lia'₂ dsa₂ i₂ma₂ca₂rë₃ŋí'₂ dsí₅, dsa₂ i₂ma₂ca₂rë₃cuí'₅ 'a₂ lia'₂ 'ua₁ dsí₅ Diú₄, dsa₂ i₂ca₂tín₂ jma₂me'₂ quió'₅ Jme₂dsí₂ Jnió₅, ⁵ dsa₂ i₂ma₂ca₂rë₃cuí'₅ a₂dse₃ jág₁ quió'₅ Diú₄, dsa₂ i₂ma₂ca₂rë₃cuí'₅ bí₂ quió'₅ mi₂güüg₃ a₂jíá₃; ⁶ nē₁jua'₂ ca₂i₃lén₂ táng₃ cau₅ jui₅,* tsá₃ ma₃lé₂ dsi₁te₁ jniog₄ jaun₂ jéin'₃ táng₃ dsí₅, ia₁ nē₂jag₄ bá₄ a₂tioin₂₃ táng₃ cróg₄ Ja₁ŋi'₅₄ Diú₄ le₃quió'₅ guioin₅₄, jaun₂ chei'₂₃ té₃jin₄ dsa₂ ia₁jaun₂ cán₂ 'éi₂ o₂guí'₃.

⁷ A₂lín₅ dsa₂ 'éi₂ lia'₂ lé₅ gua'₅₄ 'uë₃ a₂'ín'₅ jmí₅ lia'₂ co₂ráun₂ téin₃ ne₄ quió'₅. Nē₁jua'₂ ca₂rau₂ dse₃ gua'₅₄ 'uë₃ jaun₂ quió'₅ dsa₂ i₂ca₂jmo₃ ta₁ ja₁jaun₂, jaun₂ lé₂ le₃jmó'₂ ta₁ 'a₂ con'₂ ca₂rau₂, jaun₂ jme₃gu'₅₄ bá₄ Diú₄.

⁸ La₁ nē₁jua'₂ ca₂'ia₂ ni₁taun₅ quian'₅₄ ni₁nau₂, jaun₂ tsá₃ ma₃ta₁ tí₄ 'uë₃ jaun₂; go'₂ a₂'é₂ Diú₄ uig₅. Jē₁ca₂tó'₂ jaun₂, dsí'₂ bá₄ dsa₂.

A₂'éin₂ bá₄ jniog₄ jmo₅ a₂tióng₂ tiá₂

⁹ Rin'₅₄ jniog₄, o₁jñia'₅₄ ma₂nē₂jua'₅₄ jnia'₅₄ le₂nē₅, caun₂ bá₄ 'ei₅ dsi₅ jnia'₅₄ a₂jmo'₂ 'nia'₂ dse₃ gué₄ con'₂ gué₄ a₂jaun₂, a₂chan'₅₄ 'nia'₂ tiá₂ jág₁ a₂lión'₂ 'nia'₂.

¹⁰ Ia₁ dse₃ bá₄ dsí₅ Diú₄, tsá₃ jua'₅₄ a₂dsi₃'én₂ dsí₅ ca₂le₃jé₃ a₂ma₂jmo'₅₄ 'nia'₂, quian'₅₄ ca₂le₃jé₃ 'a₂ lia'₂ lé₅ a₂'nióí'₃, a₂rë₂jniá₂ ia₁ a₂ma₂jme₂'on'₅₄ 'nia'₂ dsa₂ rin'₅₄ jniog₄ i₂'én₂, jui₁lia'₂ caun₂ jmo'₂ 'nia'₂ rë₂né₃.

* 6:6 'Nio'₂ ja₁ton₅ 2 Pedro 2:21.

11 'ín₅ bá₄ dsi₅ jnia'₅₄ a₂jmo'₂ 'nia'₂ le₂jaun₂ a₂dsen₅₄ 'au'₂ le₂jang'₂ le₂jang'₂ ca₂të₂ jë₁ca₂tó'₂, ia₁jaun₂ lén'₄ 'nia'₂ co₂ñei'₅₄ ca₂le₃jé₃ a₂'ín₂ 'au'₂ 'nia'₂.

12 Tsá₃ 'niog₂ jnia'₅₄ jua'₅₄ a₂le₃juin'₃ 'nia'₂, la₁ të₂le₃ o₁nó'₅ 'nia'₂ ne₄ jui₅ quió'₅ dsa₂ i₂ma₂'én₂ i₂ma₂juin'₂ dsí₅ né₃ jaun₂ ca₂tíin₂ a₂dse₃ lia'₂ con'₂ lé₅ jág₁ quió'₅ Diú₄ a₂ma₂cuë₃.

13 Lia'₂ con'₂ jme₁ca₂cuë₃ Diú₄ jág₁ quió'₅ ca₂cuë'₃ Abraham, ca₂'iin₃ 'ñiog₅, ia₁ ca₂lia'₂ 'i₁jan₂ i₂sián'₂ tsá₃ jme₁chan₂ i₂juin'₂ gué₄ jua'₅₄ i₂'iin₃.

14 Jaun₂ ca₂juá'₂: “Të₃dsón'₂ bá₄ jme₁gu'₅₄ jniá₂ 'ne₂ 'ñio₅ lin₃, jaun₂ cuín₄ jniá₂ 'ne₂ juin₅ tsí₁jon₂.”†

15 Juin'₂ bá₄ dsí₅ Abraham ca₂jñia₃, jaun₂ ca₂gue₃ bá₄ lia'₂ con'₂ lé₅ jág₁ a₂jme₁ma₂cuë₃ Diú₄.

16 Jui₁lia'₂ jë₁'ín₅ dsa₂ mi₂güí₃ Diú₄, 'iin₂₃ jui₁lia'₂ i₂lín₅ i₂juin'₂ con'₂ gué₄ guioin₅₄, a₂jáng'₅ jág₁ dsau₅ a₂dsón'₂ bá₄ tí₅ jág₁, jaun₂ co₂në₅ bá₄ dsan₂ mi'₅₄ a₂nió'₅ quian'₅₄ riin'₅₄.

17 Ján₃ bá₄ le₂në₅ ca₂jmo₃ Diú₄ ia₁ a₂jme₁'nio₃ jme₃jnia₅ ja₁con₂ dsa₂ i₂ca₂tín₂ gue₃ lia'₂ con'₂ lé₅ jág₁ a₂ca₂cuë₃, a₂tsá₃ jme₂tsiin₃ 'a₂ lia'₂ dsi₂jio₅ dsí₅ jmo₃ ja₁coin₂. Ca₂'iin₃ 'ñiog₅ ca₂jáng'₃ jág₁ dsau₅ a₂dsón'₂ bá₄ tí₅ jág₁ quió'₅ a₂ma₂cuë₃.

18 Jaun₂ né₃, të₂le₃ quian'₅₄ tin₃ ne₅₄ jág₁ në₅ a₂tsá₃ lé₂ le₃tsín₃ a₂tsá₃ lé₂ le₃jmo₃ Diú₄ të₂jíin₁, (co₂'nió'₄ le₃jua'₅₄ jág₁ a₂ca₂cuë₃ Diú₄, quian'₅₄ jág₁ a₂ca₂'iin₃ 'ñiog₅), jaun₂ gué₁ bá₄ jniog₄ lián'₂ bën₂ jui₁lia'₂ jniog₄ i₂ma₂cuíng₅₄ a₂dsi₁lion₅₄ ja₁coin₂, ia₁jaun₂ chan'₅₄ jniog₄ tiá₂ jág₁ a₂'ín₂ dsi₅ jniog₄.

19 A₂bén₂ bá₄ jág₁ jaun₂ a₂jmo₅ a₂tióng₂ tiá₂ të₂dsi₅ jniog₄, jui₁lia'₂ bën₂ ni₁'lá'₂ quió'₅ ni₁barco

† 6:14 Génesis 22:17.

jë₁ma₂ca₂quian₃ tiá₂ ca₂të₂ 'uig₅₄ jmi₁ñí'₄. Jág₁ a₂'ín₂ dsi₅ jniog₄ jaun₂, a₂'í₂ bá₄ ca₂të₂ ja₁jñió₅ gué₄ ca₂të₂ 'ñió'₃ 'mi'₂ jñió₅, ²⁰ja₁ca₂'í₃ Jesús o₄quían₂ jniog₄, ca₂dsiáin'₃ ne₄ jui₅ quían₂ jniog₄, ia₁ a₂ca₂lín₃ jme₂dsa₂ dsen₅₄ co₂tan₅₄, ca₂ne₅₄ lia'₂ jme₁lín₄ Melquisedec.

7

Lín₅ Jesús jme₂dsa₂ ca₂ne₅₄ lia'₂ jme₁lín₄ Melquisedec

¹ Melquisedec 'éi₂ né₃ jme₁lín₄ rag₅₄ quían₅ juig₂ Salem, jme₁lín₄ jme₂dsa₂ né₃ quían₅ Diú₄ i₂juin'₂ gué₄ lín₃. Lia'₂ con'₂ jme₁ca₂jón'₃ Abraham jme₁ca₂lí'₃ 'nei₂ a₂ca₂jmo₃ quian'₅₄ rag₅₄ sián'₂, jaun₂ ca₂o₃'ín₃ Melquisedec ca₂jme₃quiong'₅₄ ca₂jme₃gu'₅₄ quió'₅.

² Ca₂cuë₃ Abraham ca₂cuë'₃ Melquisedec caun₂ qui'₅₄ a₂guia₃ con'₂ tí₅ a₂ca₂lí'₃ jë₄ 'nei₂. Le₂ne₁, jág₁ lia'₂ chen₂ Melquisedec co₂'nió'₄ le₃jua'₅₄, Rag₅₄ Dsen₃; jaun₂ táng₃, ia₁ a₂jme₁lín₄ rag₅₄ quían₅ juig₂ Salem, ja₁'nió'₄ le₃jua'₅₄, ja₁'ei₅ tei₄, ján₃ bá₄ le₂jaun₂ jein₅ jág₁, rag₅₄ ja₁'ei₅ tei₄.

³ Tsá₃ jág₁ cha₂ jua'₅₄ chan₂ jmei₂ on₃ guë'₂ chog₅₄, on₃ guë'₂ dsa₂ can'₅₄ quiáin₅; ján₃ bá₄ tsá₃ jág₁ cha₂ 'e₂ jmig₄ ca₂rë₃cháin₃, on₃ gué₄ 'e₂ jmig₄ ca₂join₃ né₃. Jaun₂ caun₂ lín₅ jme₂dsa₂ co₂tan₅₄ lia'₂ lín₅ Ja₁ñi'₅₄ Diú₄.

⁴ Në₃ né₃, quion₂ 'nia'₂ 'í₁, 'ñio₅ lín₃ jme₁juin'₂ Melquisedec, ca₂lia'₂ jnia₅ 'ñiog₅ Abraham, dsa₂ juin'₂ quían₂ jniog₄, ca₂cuë'₃ 'éi₂ caun₂ qui'₅₄ a₂guia₃ con'₂ tí₅ a₂ca₂lí'₃ quió'₅ rag₅₄ jë₄ 'nei₂.

⁵ Dsau₅ bá₄, lia'₂ con'₂ lé₅ 'Éi'₃ quió'₅ Moisés né₃, jui₁lia'₂ dsa₂ tsi₁jon₂ Leví i₂ca₂lín₃ ta₁ quió'₅ jme₂dsa₂, ca₂tñin₂ cán₂ caun₂ qui'₅₄ a₂guia₃ quió'₅ dsa₂ juig₂ ca₂le₃jé₃ a₂jme₁cha₂

quió'₅, o₁jñia'₅₄ jme₁lín₄ dsa₂ tsi₁jon₂ Abraham riin'₅₄,
jui₁lia'₂ lín₅ guoin₅₄ táng₃.

⁶ La₁ia₁ Melquisedec né₃, o₁jñia'₅₄ gué₄ tsá₃ jme₁lín₄
tsi₁jon₂ Leví, ca₂gue₃ caun₂ qui'₅₄ a₂guia₃ quió'₅ Abraham,
ca₂jme₃gu'₅₄ né₃, quió'₅ i₂jme₁ma₂ca₂gue₃ jág₁ a₂ma₂cuë₃
Diú₄.

⁷ Tsá₃ 'ein₂ lé₂ le₃juá'₂ a₂tsá₃ tí₅ jág₁ la₂: A₂juin'₂ gué₄
dsa₂ i₂jme₂gu'₅₄ con'₂ gué₄ dsa₂ i₂gue₅ a₂jme₂gu'₅₄ jaun₂.

⁸ Jaun₂ jín₄ jniog₄, jui₁lia'₂ i₂gue₅ caun₂ qui'₅₄ a₂guia₃ lín₅
dsa₂ i₂dsan₂; la₁ia₁ tē₂le₃ quió'₅ Melquisedec juá'₂ ne₄ Si₂
'iñ₂₃ 'éi₂ nē₂jag₄ bá₄ jan₂ dsa₂ i₂caun₂ chan₂.

⁹ Mei'₂ tsá₃ lé₂ le₃jua'₅₄, jui₁lia'₂ Leví quian'₅₄ le₃jín₃
jme₂dsa₂ tsi₁jon₂ 'éi₂, jui₁lia'₂ i₂gue₅ qui'₅₄ a₂guia₃ rē₂né₃,
ján₃ bá₄ ca₂quí₃ caun₂ qui'₅₄ a₂guia₃ ja₁con₂ Melquisedec
jme₁ca₂quí₃ Abraham, ¹⁰ ia₁ co₂'nió'₄ a₂jme₁ma₂lín₅ bá₄
Leví tsi₁jon₂ Abraham o₁jñia'₅₄ gué₄ tsá₃ jme₁ma₂chain₂,
lia'₂ con'₂ jme₁ca₂cuë₃ Abraham qui'₅₄ a₂guia₃ ca₂cuë₃
Melquisedec.

¹¹ Ca₂gue₃ dsa₂ juig₂ Israel 'Éi'₃ tē₂le₃ quian'₅₄ jme₂dsa₂
levitas, i₂lín₅ tsi₁jon₂ Aarón. Jaun₂ né₃, jua'₅₄ mei'₂ gué₃
'éi₂ ca₂tió'₃ jmo₃ a₂ma₂ron₂ dsa₂ tē₂le₃ quian'₅₄ 'Éi'₃ jaun₂,
jaun₂ tsá₃ jme₁ma₃'nió'₅ jua'₅₄ a₂jme₁rē₃jniá₂ táng₃ jan₂
jme₂dsa₂ sián'₂ i₂ca₂ne₅₄ jui₁lia'₂ Melquisedec, on₃jua'₅₄
jui₁lia'₂ Aarón.

¹² Ia₁ jē₁rē₂tsín₃ ta₁ quió'₅ jme₂dsa₂, ján₃ bá₄ le₂jaun₂
'nió'₅ le₃tsín₃ 'Éi'₃ ján₃.

¹³ Te₁gui'₅₄ quián₂ jniog₄ né₃, jui₁lia'₂ juá'₂ Si₂ le₂nē₅
'iñ₂₃ 'éi₂, a₂téin₅ tsi₁jon₂ sián'₂, jaun₂ 'i₁jan₂ i₂tén₅ tsi₁jon₂
'éi₂ tsá₃ ma₂lín₅ ta₁ quió'₅ ne₄chei₂.

¹⁴ Ia₁ ne₄ bá₄ jniog₄, a₂ca₂rë₃chán₃ Te₁gui'₅₄ quián₂ jniog₄ a₂lín₅ jan₂ tsí₁jon₂ quián₅ Judá. La₁ tsá₃ 'e₂ ca₂juá'₂ Moisés 'iin₂₃ tsí₁jon₂ 'éi₂ jme₁ca₂dsia₃ a₂'ë₂₃ jui₁lia'₂ ta₁ quió'₅ jme₂dsa₂.

¹⁵ 'ñio₅ gué₄ rë₂ léi₄ táng₃ jme₁ca₂rë₃jniá₂ jan₂ jme₂dsa₂ sián'₂ i₂lín₅ jui₁lia'₂ Melquisedec, ¹⁶ tsá₃ ca₂lín₃ jme₂dsa₂ 'uig₅₄ ia₁ a₂quí'₅ 'Éi'₃ a₂juá'₂ 'ein₂ tsí₁jon₂ 'nió'₅ jíá₃, jnia'₅₄ lia'₂ a₂lín₅ jme₂dsa₂ 'uig₅₄ bí₂ quió'₅ jme₂dsí₂ a₂tsá₃ lé₂ dsí₃'én₂.

¹⁷ Ia₁ le₂la₂ bá₄ juá'₂ Diú₄ 'iin₂₃ 'éi₂:

lín'₅ 'ne₂ jme₂dsa₂ con'₂ tan₅₄,
ca₂ne₅₄ lia'₂ jme₁lín₄ Melquisedec.*

¹⁸ Jaun₂ né₃, co₂ñei'₅₄ ca₂'ná₂ 'Éi'₃ a₂jme₁lé₄ le₂jñiá₅, ia₁ a₂tsá₃ jme₁bén₂, a₂tsá₃ ta₁ tí₄ né₃.

¹⁹ Ia₁ tsá₃ ca₂tió'₃ 'Éi'₃ jua'₅₄ a₂jme₃'ñiai₂₃ ta₁. Të₂le₃ ca₂rë₃chá₃ quián₂ jniog₄ caun₂ jág₁ a₂dse₃ gué₄ a₂'ín₂ dsí₅ jniog₄, të₂le₃ quián'₅₄ a₂lé₂ jme₁quián₄ jniog₄ ja₁con₂ Diú₄.

²⁰ Tsá₃ ca₂cuë₃ Diú₄ jág₁ jaun₂ quió'₅ a₂'ín₂ dsí₅ jniog₄ jua'₅₄ tsá₃ ca₂'iin₃ 'ñiog₅. Jui₁lia'₂ jme₂dsa₂ le₂jñiá₅ né₃, ca₂lín₃ ta₁ jaun₂ la₁ia₁ on₃jua'₅₄ chan₂ 'ein₂ ca₂'in₃ Diú₄ jme₁ca₂'ag₃.

²¹ La₁ të₂le₃ quió'₅ Te₁gui'₅₄ quián₂ jniog₄ né₃, chan₂ jan₂ i₂ca₂'in₃ Diú₄ jme₁ca₂lín₃ jme₂dsa₂. Ia₁ ne₄ Si₂ juá'₂ tsí'₅ 'éi₂:

Ca₂'in₃ Diú₄ 'ñiog₅,
jaun₂ tsá₃ lé₂ jme₃tsíin₃ dsí₅:

“Lín'₅ 'ne₂ jme₂dsa₂ con'₂ tan₅₄,

* ^{7:17} Salmo 110:4. Chog₅₄ si₂ a₂dse₃ gué₄ tsá₃ le₁ton₅ jág₁ a₂tio'₅₄ 'ñió'₃ corchetes [le₂la₂].

[ca₂ne₅₄ lia'₂ jme₁lín₄ Melquisedec].”†

22 'Uig₅₄ jaun₂, Jesús bá₄ i₂jmo₅ 'í₁ jág₁ a₂ma₂li'₅₄ a₂dse₃ gué'₄ jaun₂.

23 Jui₁lia'₂ jme₂dsa₂ i₂ca₂rë₃chán₃ gua'₅₄ 'uë₃ né₃, juin₅ ca₂lín₃, ia₁ tsá₃ ca₂cuë₃ 'mú₃ jmig₄ jua'₅₄ caun₂ lín₅ ta₁ jaun₂.

24 La₁ 'uig₅₄ ia₁ a₂chan₂ Jesús co₂tan₅₄ né₃, jaun₂ con'₂ tan₅₄ bá₄ lín₅ ta₁ jme₂dsa₂.

25 'Uig₅₄ jaun₂ lé₂ le₃lióin₂ co₂nei'₅₄ le₃jín₃ i₂jme₂quián₃ ja₁con₂ Diú₄ tē₂le₃ quian'₅₄ 'éi₂, ia₁ chain₂ co₂tan₅₄ a₂qui₃mi₃ ne₄ Diú₄ o₄quió'₄ le₃jín₃ 'éi₂.

26 Jaun₂ né₃, dsi₂ten₅₄ bá₄ a₂lín₅ Jesús jme₂dsa₂ dsen₅₄ i₂jme₁'nió'₅ quián₂ jniog₄. 'Éi₂ bá₄ i₂jñi₅, 'i₁caun₂ a₂'lig'₅₄ tsá₃ 'e₂ cha₂ ja₁coin₂, on₃ guë'₂ dso₄ rē₂cáin'₄, i₂rē₂jñia'₅₄ cau₅ tsá₃ quiain'₅₄ dsa₂ i₂'no₅ dso₄, i₂ca₂ron'₂ gué'₄ ñei₅ con'₂ gué'₄ guei'₅₄ mi₂güig₃.

27 Tsá₃ lín₅ lia'₂ lín₅ jme₂dsa₂ dsen₅₄ sián'₂. Tion₅₄ 'nió'₅ qui₂jme₃dsiain₂₃ já'₂ a₂jén'₅ ne₄ Diú₄ lia'₂ caun₂ jmig₄, o₄quió'₄ dsáu₁ guioin₅₄ le₂jñiá₅, jaun₂ gué'₄ o₄quió'₄ dsáu₁ dsa₂ juig₂. La₁ia₁ Jesús né₃ co₂ráun₂ tan₅₄ bá₄ ca₂jmo₃ jme₁ca₂jéin'₂ 'ñiog₅.

28 Jaun₂ Si₂ 'Éi'₃ quió'₅ Moisés né₃, 'iin₂₃ dsa₂ mi₂güig₃ 'uan₅₄ a₂lén₂ jme₂dsa₂ dsen₅₄. La₁ cang₂ gué'₄ jaun₂, ca₂cuë₃ Diú₄ jág₁ quió'₅ ca₂'iin₃ 'ñiog₅ jme₁ca₂'iin₃ Ja₁ñi'₅₄ a₂lén₂ 'éi₂ jme₂dsa₂ dsen₅₄ con'₂ tan₅₄ ia₁ ca₂jme₃'ñiai₂₃ co₂nei'₅₄.

† 7:21 Salmo 110:4. Chog₅₄ si₂ a₂dse₃ gué'₄ tsá₃ le₁ton₅ jág₁ a₂tio'₅₄ 'ñi₃ó'₃ corchetes [le₂la₂].

8

Jesus bá ₄ i₂chén' ₅ ne₄ jág₁ 'mí₂ a₂lí' ₅₄ quian' ₅₄ Diú₄

¹ A₂la₂ bá₄ jág₁ dsen₅₄ gué₄ a₂ma₂ja₂náu₅ jnia' ₅₄ jua' ₂:
a₂chan₂ bá₄ jan₂ jme₂dsa₂ dsen₅₄ le₂'éi₂ quían₂ jniog₄,
i₂ma₂ca₂guá₂ tē₂le₃ gu₂ ne₁ ne₄ta₁ quió' ₅ Diú₄ guei' ₅₄ i₂juíg₃.

² Ján₃ bá₄ jme₂ti₃ a₂líin₅ jme₂dsa₂ dsen₅₄ dsi₂néi₂
guá' ₅ jñiós tē₂dsón' ₂ a₂ca₂chi' ₃ 'ñiog₅ Te₁gui' ₅₄, on₃jua' ₅₄
a₂ca₂jmóg' ₃ dsa₂ mi₂güí₃.

³ Le₃jín₃ jme₂dsa₂ dsen₅₄ rē₂'íin₁ ia₁jaun₂ qui₃jén' ₃ 'e₂
cué' ₃ Diú₄, qui₃dsiin' ₂ já' ₂ né₃ ne₄ Diú₄. 'Uig₅₄ jaun₂ tion₅₄
'nió' ₅ a₂cha₂ caun₂ 'e₂ a₂jén' ₃ Jesucristo ne₄ 'éi₂.

⁴ Jua' ₅₄ mei' ₂ gué₃ 'éi₂ né₃, 'ein₅₄ gua' ₅₄ 'uē₃, on₃ guē' ₂
jme₁lén₂ jme₂dsa₂, ia₁ chan₂ bá₄ gué₄ jme₂dsa₂ i₂qui₂jén' ₅
'e₂ cuē₃ lia' ₂ con' ₂ lé₅ quí' ₅ Si₂ 'Éi' ₃ quió' ₅ Moisés.

⁵ Jme₂dsa₂ la₂ né₃ jme₂ti₃ ta₁ a₂líin₅, dsi₂néi₂ guá' ₅, a₂lé₅
nió' ₄ a₂rē₂'uin₄ quió' ₅ ja₁jñiós a₂cha₂ guei' ₅₄ i₂juíg₃; a₂lé₅
co₂'nió' ₄ 'en' ₂ a₂cuē₅ léi₄ quió' ₅ a₂ma₂já₅. Ma₂ne₄ bá₄ jniog₄
a₂rē₂'uin₄ bá₄ jaun₂, ia₁ lia' ₂ con' ₂ jme₁ma₂chi' ₃ Moisés
guá' ₅ tabernáculo jaun₂, ca₂juá' ₂ Diú₄: “Jag₄ de' ₂ tion' ₂ jui₅
jmo₄ con' ₂ lé₅ nió' ₄ a₂ca₂'ē₃ jniá₂ ne₄ má' ₂.”*

⁶ La₁ia₁ jme₂dsa₂ dsen₅₄ quían₂ jniog₄ guē' ₂ né₃,
ma₂ca₂'iós' ₃ ta₁ a₂jlá' ₁ gué₄ lin₃. Ján₃ bá₄ le₂nē₅ a₂jlá' ₁
gué₄ lin₃ jág₁ a₂lí' ₅₄ a₂chén' ₅ 'éi₂ ne₄, ia₁ a₂'io₅ 'uig₅₄ bēn₂
a₂dse₃ gué₄ a₂lé₅ jág₁ a₂ma₂cuē₃ Diú₄.

⁷ Ia₁ jua' ₅₄ mei' ₂ gué₃ jág₁ a₂jme₁lí' ₅₄ le₂'uig₅₄ tsá₃
'e₂ jme₁'nió' ₅, jaun₂ tsá₃ 'uig₅₄ cha₂ jua' ₅₄ a₂jme₁lé₂ jág₁
jē₁ca₂té₂ táng₃.

⁸ Ia₁ Diú₄ né₃ ca₂dsó' ₂ ja₁con₂ dsa₂ 'éi₂ caun₂ a₂tsá₃
rē₂'ñia₅, jaun₂ ca₂juá' ₂:

* 8:5 Éxodo 25:40.

Jiá₃ caun₂ jmi_g₄, juá'₂ Te₁gui'₅₄,
 a₂jmo₅₄ jniá₂ caun₂ já_g₁ 'mí'₂
 a₂lí'₅₄ quian'₅₄ dsa₂ juig₂ Israel
 quian'₅₄ dsa₂ juig₂ Judá né'₃.

⁹ On₃jua'₅₄ a₂lé₂ lia'₂ lé'₅ já_g₁
 jme₁ca₂jmo₃ jniá₂ quian'₅₄ dsa₂ can'₅₄ quiáin₅
 lia'₂ con'₂ jmi_g₄ jme₁ca₂tě₅₄ jniá₂
 ca₂jma'₃ gu₂ ca₂'uiin'₅₄ 'uě₃ Egipto.

La₁ tsá₃ ca₂jme₃ti₃ con'₂ lé'₅ já_g₁ quió₃
 a₂jme₁ca₂jmo₃ jniá₂ quiain'₅₄.

'Uig₅₄ jaun₂ bá₄ ca₂téin₃ jniá₂,
 juá'₂ Te₁gui'₅₄.

¹⁰ Já_g₁ a₂jmo₅₄ jniá₂ quian'₅₄ dsa₂ juig₂ Israel
 jě₁ma₂ŋí₂ jmi_g₄ jaun₂ lé₂ le₂la₂, juá'₂ Te₁gui'₅₄:
 Co₅₄ jniá₂ 'éi'₃ quió₃ ja₁'i₄ dsi₄ dsa₂.

Ján₃ bá₄ le₂jaun₂ taun₅₄ jniá₂ né'₃ tě₂dsí₅.

Jaun₂ gué₄ lén₂ jniá₂ Diú₄ quiáin₅,
 dsa₂ 'éi₂ guě'₂ né'₃ lén₂ dsa₂ juig₂ quiáng₃.

¹¹ Tsá₃ 'nió'₅ jua'₅₄ jme₃tšin₂₃
 le₂jan₂ le₂jan₂ dsa₂ go₅₄, on₃ guě'₂ riin'₅₄,
 ia₁jaun₂ le₃cuiin₂₃ Te₁gui'₅₄,

ia₁ le₃jín₃ bá₄ le₃cui_g₅ jniá₂
 lia'₂ i₂me'₂ gué₄ lia'₂ i₂juin'₂ né'₃.

¹² Jniá₂ né'₃ a₂ŋéi₂ dsi₃ 'éng₄
 le₃jé₃ a₂'lig'₅₄ a₂qui₂rě₂cáin'₄,
 lia'₂ o₁lí_g₂ jmi_g₄ tsá₃ ma₃dsiog'₂ dsi₃
 dsáu₁ dsa₂.†

¹³ Jui₁lia'₂ jě₁'ě₅ Diú₄ já_g₁ 'mí'₂ a₂lí'₅₄, co₂'nió'₄ a₂jmo₂₃
 a₂tsá₃ ma₃ta₁ tí₄ já_g₁ a₂jme₁lí'₅₄ le₂'uig₅₄. Jui₁lia'₂ a₂tsá₃ ta₁

† 8:12 Jeremías 31:31-34.

tí₄ né₃, a₂ma₂'ei₅ ne₄ lé₂ gui'₅₄, a₂ma₂ja₂quián₃ dsi'₃én₂ bá₄ jaun₂.

9

Guá'₅ a₂cha₂ gua'₅₄ 'uě₃ la₂, quian'₅₄ guá'₅ a₂cha₂ guei'₅₄ i₂juíg₃

¹ Né₃ né₃, jui₁lia'₂ jág₁ a₂jme₁li'₅₄ le₂'uig₅₄, jme₁quian'₅₄ 'éi'₃ jui₁lia'₂ 'a₂ lia'₂ jme₃ti₃ dsa₂ ne₄ Diú₄, ján₃ bá₄ jme₁cha₂ caun₂ ja₁jñiós a₂ca₂jmo₃ dsa₂ mi₂güüg₃. ² Jui₁lia'₂ guá'₅ tabernáculo jaun₂: dsi₂néi₂ le₂'uig₅₄ jaun₂ jme₁chí'₄ ni₁ñí₁ a₂le₁dsi₅₄ tag₄ ja₁le₁guí'₂ si₂, quian'₅₄ ni₁mesa ja₁niogs i₁ñí'₄ jñiós; “ja₁jñiós” jme₁chei₂ dsi₂néi₂ le₂'uig₅₄ jaun₂.

³ Le₃co'₅₄ 'mi'₂ cortina ja₁ca₂té₂ táng₃, jme₁lé₄ ja₁chei₂ Ja₁jñiós Lin₃ Gué₄. ⁴ Ja₁jaun₂ jme₁chí'₄ caun₂ ne₄chei₂ a₂lé₅ jmá'₃ quian'₅₄ cu₄nióg₄ ja₁qui₂dsi'₂ chen₂, quian'₅₄ tsi₁gu₅ quió'₅ jág₁ a₂lí'₅₄ quian'₅₄ Diú₄. Rě₂lióg₃ ta₁caun₂ tsi₁gu₅ quian'₅₄ cu₄nióg₄. 'ñiós₃ jaun₂ jme₁chí'₄ ni₁dsig₁ cu₄nióg₄ a₂jme₁tio'₅₄ i₁ñí'₄ maná, quian'₅₄ 'ma₂'i₅₄ quió'₅ Aarón a₂ca₂'ia₂ tsin₅ né₃. Já₃n₃ bá₄ jme₁tio'₅₄ ni₁cang₁ 'í₂ a₂le₁ton₅ jág₁ a₂lí'₅₄ quian'₅₄ Diú₄. ⁵ Ne₄ tsi₁gu₅ jaun₂ jme₁tión₂ le₁jné₅ querubines, co₂'nió'₄ léi₄ a₂tág₅ co₂'né'₅ quió'₅ Diú₄. Jme₁le₁jné₅ qui₂rě₂jlä₅ quian'₅₄ tsi₁rě₂cu₅ ja₁'én₂ Diú₄ dsáu₁ dsa₂. La₁ia₁ tsá₃ jě₄ jua'₅₄ le₃jua'₅₄ gué₄ jnia'₅₄ jág₁ 'lióng₂ jui₁lia'₂ ca₂le₃jě₃ a₂ně₅, ne₄ si₂ la₂.

⁶ Jme₁ma₂lě₅ co₂jñia₅₄ le₃jě₃ a₂jaun₂ né₃, jaun₂ gué₄ qui₂dsi₂ton'₅₄ i₂gú'₃ jme₂dsa₂ dsi₂néi₂ le₂'uig₅₄ qui₂dsi₂jmo₂ lia'₂ con'₂ lé₅ ta₁ a₂líin₅. ⁷ La₁ia₁ jě₄ca₂té₂ táng₃ dsi₂néi₂, dsi₂'í₂ jñia'₅₄ lia'₂ jme₂dsa₂ dsen₅₄ co₂ráun₂ lia'₂ caun₂ ñi₂, la₁ tsá₃ 'í₂ jua'₅₄ tsá₃ quian'₅₄ jmi₄ já'₂ a₂qui₂dsi₃jen'₅₄ o₄quió'₄ dsáu₁ 'ñiog₅ quian'₅₄ dsáu₁ dsa₂ juig₂ a₂ca₂'náu₂ tě₃ tsá₃ ñi₅. ⁸ Le₂ně₅ jme₁jme₂jniá₂ Jme₂dsí₂

Jñió₅, a₂tsá₃ jme₁ma₂rë₂na₄ gué₄ jui₅ ja₁dsi₃ton'₅₄ dsa₂ ja₁jñió₅ lin₃ gué₄, të₁lia'₂ jme₁chí'₄ gué₄ guá'₅ le₂'uig₅₄.
⁹ Co₂'nió'₄ a₂jáng'₅ léi₄ a₂la₂, jui₁lia'₂ quió'₅ jmig₄ rë₂né₃, ia₁ le₃jé₃ a₂cué'₃ dsa₂ Diú₄, quian'₅₄ le₃jín₃ já'₂ a₂qui₂jén'₅ dsa₂ ne₄ Diú₄ né₃, tsá₃ a₁jaun₂ tió'₅ le₃'ñia₅ dsa₂ jua'₅₄ a₂jñiá'₂ a₂qui₂dsi₂jñi₅ dsí₅.
¹⁰ Jñia'₅₄ lia'₂ jaun₂ bá₄ ta₁ quí'₅ le₃jé₃ a₂jaun₂ jui₁lia'₂ 'a₂ lia'₂ lé₅ má₃ a₂gué'₅ dsa₂, a₂'ín'₂ dsa₂, quian'₅₄ le₃jé₃ gué₄ 'e₂ a₂jmo₂₃ a₂le₁jín₃, jmá'₃ 'éi'₃ quió'₅ le₃co'₅₄, jaun₂ quen₅ ca₂tiá₂, ca₂lia'₂ jme₃rë₃ Diú₄ le₃jé₃.

Ta₁ a₂quí'₅ jmi₄ Cristo

¹¹ La₁ia₁ ma₂guan₅ Cristo, jaun₂ 'éi₂ bá₄ ma₂lín₅ jme₂dsa₂ dsen₅₄ i₂quió'₅ le₃jé₃ a₂dse₃ a₂ma₂o₂lé₂. Ma₂ca₂'í₃ guá'₅ jlá'₁ gué₄ a₂rë₂'ñia₅, on₃jua'₅₄ a₂ca₂jmo₃ dsa₂ mi₂güüg₃. Co₂'nió'₄ le₃jua'₅₄, on₃jua'₅₄ quió'₅ mi₂güüg₃ la₂.
¹² On₃jua'₅₄ a₂ca₂'í₃ të₂le₃ quian'₅₄ jmi₄ chein₄ lau₂ on₃ gué₄ quian'₅₄ jmi₄ guein₂ ca₁jui₅ né₃, la₁ të₂le₃ quian'₅₄ jmi₂ 'ain₅₄ 'ñiog₅ bá₄ ca₂'í₃ ja₁jñió₅ gué₄ co₂ráun₂ tan₅₄, jaun₂ le₂në₅ bá₄ ca₂'nú₂ a₂lió₂ jniog₄ co₂tan₅₄.
¹³ Dsón'₂ bá₄ dsau₅ quí'₅ ta₁ jui₁lia'₂ jmi₄ ca₁jui₅, quian'₅₄ jmi₄ chein₄ lau₂, quian'₅₄ ti₁juá₃ quió'₅ guein₂ ca₁jui₅ i₂qui₂dsin'₂ ne₄chei₂, a₂qui₂rë₂séi₂ ne₄ quió'₅ dsa₂ i₂tsá₃ le₁jín₃. Quí'₅ ta₁ a₂jme₃jñió₃ jui₁lia'₂ dsa₂ i₂ma₂le₁jín₃ le₃co'₅₄.
¹⁴ La₁ ja₂lín₃ gué₄ quen₅ jmi₄ Cristo i₂ca₂jén'₂ 'ñiog₅ ne₄ Diú₄ të₂le₃ quian'₅₄ Jme₂dsí₂ i₂chan₂ co₂tan₅₄, ca₂join₃ të₃ tsá₃ 'e₂ rë₂cáin'₄. Quian'₅₄ jui₅bí₂ jmi₄ Cristo a₂jmo₅ le₁jé₃ të₂dsi₅ jniog₄, a₂tsá₃ ma₃jmo₂ jniog₄ a₂jniog₅ jui₅ 'mú₃ ia₁jaun₂ lé₂ jme₁ti₁ jniog₄ ne₄ Diú₄ jén'₃.

15 'Uig₅₄ jaun₂, Jesucristo bá₄ lín₅ i₂chén₅ ne₄ jág₁ 'mí₂ a₂li₅₄ * quian₅₄ Diú₄, ia₁jaun₂jui₁lia₂ i₂ma₂ca₂tág₃ Diú₄, lé₂ le₃gue₃ a₂ca₂tiin₂ a₂jio₅ co₂tan₅₄ con₂' lé₅ jág₁ a₂ma₂cuë₃ Diú₄ a₂cuë₃. Ia₁ quian₅₄ 'mú₃ quió₅ Cristo, ca₂lón₂ dsa₂ i₂ca₂'náu₂ dso₄ lia₂ con₂' jme₁li₅₄ gué₄ jág₁ le₂'uig₅₄.

16 Jui₁lia₂ ja₁ron₅ jág₁ a₂ma₂quiog₂ dsa₂ né₃ gué₄ a₂jóin₂, tion₅₄ 'nió₅ con₂ dsa₂ jág₁ dsau₅ chi₂jua₂ ma₂jon₅ bá₄ dsa₂ i₂ca₂jmo₃, ia₁jaun₂ bá₄ lé₂ le₃ti₃ jág₁ a₂ca₂quiog₂ jaun₂. 17 Jaun₂ lë₃, tsá₃ ta₁ tí₄ jág₁ le₂jaun₂ të₁lia₂ në₅ bá₄ chan₂ dsa₂ i₂ca₂jmo₃; jñia₅₄ lia₂ jë₁ma₂ca₂join₃ bá₄ qui₅ ta₁. 18 'Uig₅₄ jaun₂, jág₁ a₂jme₁li₅₄ né₃, tsá₃ ca₂quí₃ ta₁ jua₅₄ tsá₃ ca₂tang₂ jmi₂. 19 Ia₁ cang₂ jme₁ma₂ca₂'é₂ Moisés ca₂le₃jé₃ jág₁ quió₅ 'Éi₃ Juá₅ ca₂'é₃ dsa₂ juig₂, jaun₂ gué₄ ca₂can₃ ni₁jñi₂ guéin₂ quió₅ já₂ cha₂, quian₅₄ caun₂ ni₁gu₂ ni₁'ma₂ hisopo, jaun₂ ca₂jme₃jlé₃ quian₅₄ jmi₄ guein₂ ca₁jui₅ quian₅₄ jmi₄ chein₄ lau₂ a₂rë₂cón₅ quian₅₄ jmi₂, † jaun₂ gué₄ ca₂séi₂ lia₂ ne₄ si₂ a₂rë₂bin₅ ja₁le₁ton₅ 'éi₃, lia₂ ne₄ quió₅ le₃jín₃ dsa₂ né₃. 20 Jaun₂ gué₄ ca₂tsí₃ dsa₂ juig₂: “A₂la₂ bá₄ jmi₂ quió₅ jág₁ a₂ma₂li₅₄ quian₅₄ Diú₄, lia₂ con₂' lé₅ 'éi₃ a₂ma₂jmo₃ Diú₄ quián₂ 'nia₂.” ‡ 21 Ján₃ bá₄ ca₂séi₂ Moisés quian₅₄ jmi₂ jaun₂, guá₅ tabernáculo quian₅₄ le₃jé₃ gué₄ a₂jmo₂ dsa₂ ta₁ guá₅. 22 Dsón₂ bá₄ jaun₂, con₂' lé₅ ta₁ qui₅ Si₂ 'Éi₃, mei₂ tsá₃ le₃jé₃ bá₄ 'nió₅ qui₂le₃chí₂ quian₅₄ jmi₂. Jaun₂ tsá₃ o₂'én₂ dso₄ cha₂ jua₅₄ tsá₃ qui₂i₂'o₅₄ jmi₂.

Jmi₂ a₂ca₂jén₃ Cristo bá₄ jñiá₂ dsáu₁ dsa₂

* 9:15 'Nio₂ ja₁ton₅ Mateo 26:28, Marcos 14:24, Lucas 22:20, 1 Corintios 11:25. † 9:19 'Nio₂ ja₁ton₅ Juan 19:34. ‡ 9:20 Éxodo 24:8.

23 Jaun₂ lë₃, tion₅₄ bá₄ qui₂le₃chí₂ le₂në₅ quian'₅₄ jmi₄ já'₂ ca₂le₃jé₃ a₂jaun₂ a₂qui₂rë₂'uin₄ jui₁lia'₂ quió'₅ guei'₅₄ i₂juíg₃. La₁ia₁ ca₂le₃jé₃ a₂në₅ a₂cha₂ guei'₅₄ i₂juíg₃ né₃, tion₅₄ 'nió'₅ séi₂ quian'₅₄ jmi₂ a₂dse₃ gué₄ con'₂ gué₄ a₂jaun₂. 24 Ia₁ on₃jua'₅₄ a₂ca₂'í₃ Cristo dsi₂néi₂ja₁jñi₅ jaun₂ a₂rë₂lag₄ quian'₅₄ gu₂-tag₄ dsa₂ mi₂güí₃, a₂rë₂'uin₄ quió'₅ ja₁jñi₅ 'ñiog₅ dsón'₂, la₁ tē₂le₃ co₂dsa₅ guei'₅₄ i₂juíg₃ 'ñiog₅ dsón'₂ bá₄ ca₂'í₃, ja₁qui₂jme₂jñiai₂₃ jmi₄ rë₂në₃ ne₄ Diú₄ o₄quián₂ jniog₄. 25 Tsá₃ jaun₂ qui₂ca₂'í₃ i₂gú'₃ jua'₅₄ qui₂ca₂jéin'₂ 'ñiog₅ jui₁lia'₂ dsi₂'í₂ jme₂dsa₂ dsen₅₄ ja₁jñi₅ gué₄ lia'₂ caun₂ ñi₂ a₂qui₂dsi₂jen'₅₄ jmi₄ i₂sián'₂. 26 Jua'₅₄ mei'₂ gué₃ le₂jaun₂ né₃, tion₅₄ bá₄ jme₁'nió'₅ jóin₂ 'líong₂ ráun₂ ca₂le₃ ca₂nio₃ mi₂güí₃. La₁ia₁ le₂la₂ bá₄ lé₅ jui₁lia'₂ rë₂në₃, a₂jë₁ma₂ca₂dsin₃ jmi₄, ca₂jme₃jniá₂ Cristo co₂ráun₂ tan₅₄ bá₄ ia₁jaun₂ lé₂ le₃jñiá'₂ dsáu₁ dsa₂ tē₂le₃ quian'₅₄ a₂ca₂jéin'₂ 'ñiog₅. 27 Jaun₂ jui₁lia'₂ co₂ráun₂ bá₄ ca₂tín₂ dsa₂ mi₂güí₃ dsiáin₃, jaun₂ cang₂ jaun₂ jiá₃ jmi₄ jë₁të₃dsi₅₄ 'éi'₃, 28 já₃ bá₄ le₂jaun₂, co₂ráun₂ tan₅₄ bá₄ ca₂jon₃ Cristo ia₁jaun₂ qui₃cán₂ dsáu₁ dsa₂ mi₂güí₃. Cang₂ gué₄ jaun₂ jme₃jñiai₂₃ jë₁ca₂té₂ táng₃, la₁ on₃jua'₅₄ 'uig₅₄ dsáu₁ dsa₂, a₂ja₃lioin₅₄ jui₁lia'₂ i₂qui₂le₁jñiog₅ bá₄.

10

1 Ia₁ Si₂ 'Éi'₃ quió'₅ Moisés né₃, co₂'nió'₄ caun₂ 'en'₂ quió'₅ a₂dse₃ a₂ja₃lé₂, on₃jua'₅₄ rë₂' a₂ lia'₂ lé₅ dsón'₂. 'Uig₅₄ jaun₂, lia'₂ o₁lí₂g'₂ jmi₄ tsá₃ tió'₅ 'Éi'₃ jaun₂ jua'₅₄ a₂jme₃'ñiai₂₃ jui₁lia'₂ dsa₂ i₂ja₂quián₃ ja₁con₂ Diú₄ tē₂le₃ quian'₅₄ a₂caun₂ qui₂jén'₃ jmi₄ já'₂ le₂jaun₂, lia'₂ 'í₂ ñi₂.

2 Jua'₅₄ mei'₂ gué₃ tió'₅ le₂jaun₂, ¿tsa₁ jme₁ma₂'ná₃ a₂jén'₃ dsa₂ já'₂ ne₄ Diú₄, lín'₂ 'nia'₂? Ia₁ tsá₃ ma₃'e₂

qui₂dsi₂ñji₅ dsí₅ dsa₂ dsáu₁ i₂jme₂ti₃ le₂jaun₂ jë₁ma₂ca₂rín'₂
jme₂dsí₂ quió'₅.

³ Të₂le₃ qui₂dsau'₂ dsí₅ bá₄ dsa₂ lia'₂ 'í₂ ñi₂ a₂jéin'₂ já'₂
a₂qui₂rë₂cáin'₄ dso₄, ⁴ ia₁ tsá₃ lé₂ ñjiá'₂ dsáu₁ dsa₂ jui₁lia'₂
jmi₄ ca₁jui₅ quian'₅₄ jmi₄ chein₄ lau₂.

⁵ 'Uig₅₄ jaun₂, lia'₂ con'₂ jme₁ca₂'í₃ Cristo mi₂güüg₃,
ca₂juá'₂ ca₂tsí'₃ Diú₄:

Tsá₃ 'niog'₂ a₂qui₃jén'₂ dsa₂ já'₂ ne'₅₄,

on₃ guë'₂ 'niog'₂ 'e₂ jme₁cué'₅ dsa₂ 'ne₂.

La₁ ca₂jmo'₅₄ co₂ñja₅₄ quió₃

caun₂ ñi₄ dsa₂ mi₂güüg₃.

⁶ Tsá₃ ca₂té₂ 'au'₂ a₂qui₂dsín'₂ dsa₂ já'₂,

on₃ gué₄ ca₂té₂ 'au'₂ 'e₂ a₂qui₂ca₂cué'₃ dsa₂ 'ne₂

o₄quió'₄ dsáu₁ dsa₂.

⁷ 'Uig₅₄ jaun₂ ca₂juá'₃:

“Jag₄, la₂ guio₃, jmo₅₄ a₂'ñio₂ 'au'₂ 'ne₂,

Diú₄ quiáng₃,

jui₁lia'₂ chi₁ton₅ ne₄ si₂ a₂rë₂bin₅,

a₂'ag₂₃ jniá₂.”*

⁸ Le₂'uig₅₄, juá'₂: “Tsá₃ 'nio₃ Diú₄ on₃ guë'₂ të₅ dsí₅
a₂qui₃jén'₂ dsa₂ já'₂ ne₅₄, on₃ guë'₂ jui₁lia'₂ a₂jme₁cué'₅ dsa₂
Diú₄ o₄quió'₄ dsáu₁ dsa₂”, (o₁ñja'₅₄ jén'₃ dsa₂ lia'₂ con'₂
quió'₅ 'Éi'₃ a₂'nió'₅ jmo₃ dsa₂).

⁹ Jaun₂ né₃, cang₂ gué₄ jaun₂, juá'₂: “La₂ guio₃ jmo₅₄
a₂'ñio₂ 'au'₂ 'ne₂, Diú₄ quiáng₃.” Co₂'nió'₄ a₂juá'₂ ca₂dsia₃
cau₅ a₂le₂'uig₅₄ jaun₂, ia₁jaun₂ ca₂chi'₃ jág₁ jë₁ca₂té₂ táng₃.

¹⁰ 'Uig₅₄ ia₁ a₂ca₂jmo₃ Jesucristo a₂'ñio₂ dsí₅ Diú₄ jaun₂,
ma₂ca₂rë₃ñjió₄ jniog₄ jme₁ca₂jén'₃ ni₁ñi₁₂ 'ñiog₅ co₂ráun₂
tan₅₄. ¹¹ Caun₂ tión₂ bá₄ jme₂dsa₂ lia'₂ 'í₂ jmig₄ a₂qui₂jmo₂₃

* 10:7 Salmo 40:6-8.

ta₁ a₂líin₅, lia'₂ ma₂jmo₂₃ jaun₂ bá₄ a₂qui₂jéin'₂ já'₂ 'lióng₂
ráun₂, ton'₂ tsá₃ tió'₅ gué'₂ 'éin₂ dsáu₁ dsa₂.

¹² La₁ Jesucristo né₃, jme₁ma₂ca₂jéin'₂ 'ñiog₅ co₂ráun₂
tan₅₄ jaun₂ o₄quió'₄ dsáu₁ dsa₂, jaun₂ gué'₄ ca₂guá₂ të₂le₃
gu₂ ne₁ Diú₄.

¹³ Ja₁jaun₂ guá₅ chi₁ñia₂₃ ca₂lia'₂ ca₂jmo₃ Diú₄ co₂'nió'₄
caun₂ ja₁chi'₃ tag₅₄ quian'₅₄ quió'₅ dsa₂ i₂'iog₅₄ quió'₅.

¹⁴ Ia₁ të₂le₃ quian'₅₄ a₂ca₂jéin'₂ co₂ráun₂ jaun₂,
ca₂rë₃'ñia₅ co₂tan₅₄ dsa₂ i₂lë₅ 'í₁ quiáin₅.

¹⁵ Ján₃ bá₄ le₂jaun₂ jáng'₅ jág₁ dsau₅ Jme₂dsí₂ Jñiós.
Ca₂juá'₂ le₂'uig₅₄:

¹⁶ Já₁g₁ a₂jmo₅₄ jniá₂ a₂li'₅₄ quian'₅₄ dsa₂ 'éi₂
cang₂ jmig₄ jaun₂,
lé₂ le₂la₂, juá'₂ Te₁gui'₅₄.

Co₅₄ jniá₂ 'éi'₃ quió₃ të₂dsí₅ dsa₂ 'éi₂.

Ján₃ bá₄ taun₅₄ jniá₂ ja₁'i₄ dsi₅₄ táng₃.†

¹⁷ Cang₂ gué'₄ jaun₂ juá'₂ táng₃:

Lia'₂ o₁líg'₂ jmig₄ tsá₃ ma₃dsiog'₂ dsi₃ jniá₂
dso₄ a₂jme₁rë₂cáin'₄,
on₃ gué'₂ 'e₂ a₂'lig'₅₄ a₂ma₂jmo₃.‡

¹⁸ Jaun₂ né₃, chi₂jua'₂ ma₂ca₂'en₃ dsáu₁ dsa₂, jaun₂ tsá₃
ma₂'e₂ 'nió'₅ jén'₃ gué'₄ dsa₂ o₄quió'₄ dsáu₁.

Ma₃ jme₁quián₄ jniog₄ ja₁con₂ Diú₄

¹⁹ Jaun₂ lë₃, rin'₅₄ jniog₄, 'uig₅₄ ia₁ a₂ma₂lé₂ dsi₁tió'₄
jniog₄ caun₂ bá₄ 'ei₅ dsi₅ ca₂të₂ ja₁jñiós₅ lin₃ gué'₄ të₂le₃
quian'₅₄ jmi₄ Jesucristo, ²⁰ të₂le₃ quian'₅₄ jui₅ 'mí₂ jén'₃
a₂ca₂niá₃ 'éi₂ në₂jag₄ bá₄ të₂le₃ quian'₅₄ 'mi'₂ cortina,
co₂'nió'₄ le₃jua'₅₄ të₂le₃ quian'₅₄ ni₁ñi₁₂ 'ñiog₅, ²¹ ján₃ bá₄
'uig₅₄ ia₁ a₂chan₂ jme₂dsa₂ dsen₅₄ juin'₂ quián₂ jniog₄

† 10:16 Jeremías 31:33. ‡ 10:17 Jeremías 31:34.

i₂nio₅ gu₂ dsa₂ quián₅ Diú₄, ²² 'uig₅₄ jaun₂ né₃, ma₃ jme₁quián₄ jnio₄ ja₁con₂ Diú₄ ca₂le₃jě₃ dsi₅ jnio₄, caun₂ bá₄ 'ei₅ dsi₅ a₂'éin₂, a₂tsá₃ ma₃'e₂ qui₂dsi₂jñi₅ dsi₅ jnio₄, nē₂jag₄ bá₄ a₂ma₂qui₂le₁chí₄ a₂ma₂qui₂le₁séi₂ dsi₅ jnio₄. Ján₃ bá₄ le₂jaun₂ co₂'nió'₄ a₂ma₂ca₂rin'₂ n₁iñi₁ jnio₄ quian'₅₄ jmig₂ le₁jě₃.

²³ Jui₁náu₂ jnio₄ tiá₂ a₂'éin₂, tsá₃ jui₁'éi₂ jnio₄ caun₂-tin₃ dsi₅ jui₁lia'₂ jág₁ a₂'ín₂ dsi₅. Ia₁ i₂rě₂ti'₅₄ bá₄ Diú₄ i₂ma₂cuě₃ jág₁ quió'₅.

²⁴ Ján₃ bá₄ jui₁'niog'₅₄ jnio₄ dsi₅ 'a₂ lia'₂ tion'₅₄ jnio₄ jág₁ rin'₅₄ le₂jau₂ le₂jau₂ a₂jme₁'nio₃ jnio₄ dsa₂, a₂jmó₁ jnio₄ a₂dse₃.

²⁵ Tsá₃ jui₁tí₄ jnio₄ a₂ñag'₂ jnio₄ co₂lě₅, jui₁lia'₂ ma₂tin₂ i₂lín₅₄, tē₂le₃ 'nió'₅ cuě'₅₄ jnio₄ bí₂ rin'₅₄ le₂jau₂ le₂jau₂, tē₂le₃ lé₅ gué₄ ia₁ ma₂léi₄ a₂ma₂ja₂quián₃ jmig₄ jaun₂.

²⁶ Ia₁ nē₁jua'₂ a₂ta₁ dsi₅ jnio₄ caun₂ qui₂'niog₂ dso₄ tē₃ ma₂ne₅₄ jág₁ dsau₅, jaun₂ tsá₃ ma₂'e₂ cha₂ gué₄ jua'₅₄ lé₂ le₃jen'₄ jnio₄ o₄quió'₄ dsáu₁.

²⁷ Jñia'₅₄ lia'₂ a₂jaun₂ bá₄ 'ei₅ gué₄ a₂jñia₅ jnio₄ a₂'ei₅ gau₂ jě₁qui₃dsi₅ Diú₄ 'éi'₃, jui₁lia'₂ jě₁cau₂ si₂ a₂quión₃ i₂'iog₅₄ quió'₅ Diú₄.

²⁸ Jui₁lia'₂ dsa₂ i₂tsá₃ dsáu₅ dsí₅ 'Éi'₃ quió'₅ Moisés, tion₅₄ bá₄ jón₂ tsá₃ o₂'én₂ dso₄ cha₂ quió'₅, 'uig₅₄ jág₁ dsau₅ a₂jáng'₅ on₃-ún₂.[§]

²⁹ Jaun₂ né₃, ħ'e₂ gué₄ uig₅ ca₂tín₂, lín'₂ 'nia'₂, jui₁lia'₂ dsa₂ i₂qui₂tsón'₁ Ja₁ñi'₅₄ Diú₄, jui₁lia'₂ dsa₂ i₂tsá₃ ji'₅₄ jmi₄ 'éi₂ a₂ca₂lí'₃ jág₁ a₂con'₂ ca₂chein'₃ 'éi₂, jui₁lia'₂ dsa₂ i₂tě₂'on'₂ Jme₂dsí₂ quián₅ Diú₄ i₂'ua₁ dsí₅?

§ 10:28 'Nio'₂ ja₁ton₅ Números 35:30; Deuteronomio 17:6.

30 Ma₂ne₄ bá₄ jniog₄ a₂ca₂juá'₂ Te₁gui'₅₄: “Jniá₂ bá₄ ca₂tíng₂ 'é₄ uig₅ dsa₂; já_n₃ bá₄ jniá₂ qui₄.”* Con'₂ siá'₂ ca₂juá'₂: “Qui₃dsi₅ Te₁gui'₅₄ 'éi'₃ ja₁con₂ dsa₂ juig₂ quiáin₅.”†

31 ¡A₂gau₂ bá₄ jaun₂ a₂tían'₃ dsa₂ o₄gú₃ Diú₄ jén'₃!

32 La₁ dsá₂ 'au'₂ 'nia'₂ jmo₄ jmig₄ le₂ñjá₅, lia'₂ con'₂ le₂'uig₅₄ jme₁ca₂rë₃ñí'₂ 'au'₂ 'nia'₂, já_n₃ bá₄ 'a₂ lia'₂ juin'₂ 'au'₂ 'nia'₂ ca₂tiang'₃ ca₂gueng'₅₄ mi'₅₄ o_{2i1} dsi₅ quian'₅₄ uig₅ a₂ca₂i₃ñíg'₂.

33 I₂lin₅₄ 'nia'₂ qui₂ca₂jnaú'₂ dsa₂ já_g₁ qui₂ca₂jmóg'₂ tē₃jin₄ dsa₂ juig₂. I₂lin₅₄ guè'₂ ca₂jme₃quiong'₅₄ ca₂jme₃quian'₅₄ dsa₂ i₂qui₂ca₂ñág₃ uig₅ le₂në₅.

34 'Nia'₂ né₃ ca₂dsia'₅₄ ñéi'₂ 'au'₂ i₂jme₁tion'₅₄ né'₃ 'má₃. Já_n₃ bá₄ ca₂jmo'₅₄ 'nia'₂ 'io'₂ ca₂tiang'₃ lia'₂ con'₂ jme₁qui₂ca₂jñiá'₂ dsa₂ le₃jé₃ 'e₂ a₂jme₁cha₂ quián'₂ 'nia'₂. Ia₁ ñi'₅₄ bá₄ 'nia'₂ a₂cha₂ guei'₅₄ i₂juíg₃ caun₂ a₂dse₃ gué₄ a₂jiog₅ co₂tan₅₄ a₂ca₂tíng'₂.

35 Jaun₂ lë₃, tsá₃ lë₁dsia₂ cau₅ a₂caun₂ 'ei₅ 'au'₂, ia₁ 'ñio₅ lin₃ bá₄ quen₅ a₂quí₃ Diú₄ 'lia'₅₄ a₂'éng'₂.

36 Ia₁ 'nió'₅ quián'₂ 'nia'₂ a₂jmó'₂ tió'₃ 'au'₂, ia₁jaun₂ lé₂ le₃jmó'₂ 'nia'₂ a₂'ñio₂ dsí₅ Diú₄, ia₁jaun₂ guéi'₁ 'nia'₂ a₂ma₂ca₂juá'₂ 'éi₂ cuë₃.

37 Ia₁ ñi'₅₄ ta₁, 'ñio₅ ñi'₅₄ ta₁:

Jiá₃ i₂ma₂lé₅ já_g₁ jiá₃,

tsá₃ le₃'iin₅₄.

38 La₁ dsa₂ i₂ñt₅ jui₅ co₂rë₂ ia₁ a₂'éin₂,

'éi₂ bá₄ le₃chan₂.‡

Jaun₂ në₁jua'₂ dsi₂lein₃ le₃ca'₃,

* 10:30 Deuteronomio 32:35. † 10:30 Deuteronomio 32:36; Salmo 135:14.

‡ 10:38 o₃, “La₁ tē₂le₃ quian'₅₄ a₂'én₂ bá₄ dsa₂ le₃chain₂, já_g₂ Diú₄ në₂jag₄ bá₄ dsa₂ dsen₃.”

tsá₃ dse₃ 'ag₃ dsi₃ jniá₂ quian'₅₄ 'éi₂.[§]

³⁹ La₁ jniog₄ né₃, tsá₃ tíong₂ quian'₅₄ dsa₂ i₂dsi₂len₃ le₃ca'₃ i₂qui₂dsi₂'én₂ quió'₅. Le₃jaun₂ bá₄ tíong₂ jniog₄ le₃quió'₅ dsa₂ i₂'én₂, jaun₂ le₂ně₅ bá₄ tîn'₄ jme₂dsí₂ quián₂.

11

Jui₁lia'₂ a₂'én₂ dsa₂

¹ Ně₃ né₃, jui₁lia'₂ dsa₂ i₂'én₂ né₃, caun₂ bá₄ 'ei₅ dsí₅ a₂gue₃ a₂jaun₂ a₂'ín₂ dsí₅; ján₃ bá₄ jáng'₅ léi₄ a₂'éin₂, a₂cha₂ tē₃dsón'₂ jui₁lia'₂ a₂tsá₃ jniá₂.

² Ia₁ le₂ně₅ bá₄ ca₂rě₃'én₂ dsa₂ can'₅₄ ma₂líg'₂, jaun₂ ca₂'ag₃ dse₃ Diú₄.

³ Tě₂le₃ a₂'éin₂ bá₄ jniog₄, ŋág'₂ jniog₄ a₂ca₂jmo₃ Diú₄ bá₄ mi₂güüg₃ tě₂le₃ quian'₅₄ jág₁ quió'₅. Jaun₂ lě₃, jui₁lia'₂ a₂jniá₂ rě₂ně₃ ca₂lě₃ tě₂le₃ quian'₅₄ a₂tsá₃ jme₁rě₂jniá₂.

Tě₂le₃ a₂'én₂ dsa₂

⁴ Tě₂le₃ a₂'én₂ bá₄ Abel,* ca₂jén'₃ ne₄ Diú₄ caun₂ a₂dse₃ gué₄ con'₂ gué₄ a₂ca₂jén'₃ Caín riin'₅₄. 'Uig₅₄ jaun₂ ca₂'ag₃ dse₃ Diú₄ co₂'nió'₄ dsa₂ dsen₃, lia'₂ con'₂ jme₁ca₂gue₃ a₂ca₂jén'₃ jaun₂. Jaun₂ né₃, o₁jŋia'₅₄ gué₄ ma₂rě₂jon₅₄ Abel, ně₂jag₄ bá₄ a₂caun₂ jáng'₅ jág₁ dsau₅ rě₂ně₃, ia₁ a₂ca₂rě₃'éin₂.

⁵ Tě₂le₃ a₂'én₂ bá₄ Enoc,† ca₂ŋái'₃ mi₂güüg₃ caun₂ tē₃ tsá₃ ca₂join₃, tsá₃ ma₂'ein₂ ca₂dsáu'₂ quió'₅, ia₁ Diú₄ bá₄ i₂ca₂tág₃ quió'₅. Ne₄ si₂ juá'₂ a₂ca₂'ag₃ dse₃ Diú₄ né'₃ gué₄ a₂tě₂, ia₁ lia'₂ con'₂ jme₁chain₂ ca₂jmo₃ a₂ca₂tě₂ dsí₅ Diú₄.

⁶ La₁ia₁ lia'₂ o₁líg'₂ jmig₄ tsá₃ lé₂ le₃jmo₃ dsa₂ a₂jme₂'ŋio₂ dsí₅ Diú₄ ně₁juá'₂ tsá₃ 'éin₂, ia₁ jui₁lia'₂ dsa₂ i₂'nio₃

§ 10:38 Habacuc 2:3-4. * 11:4 Abel: 'Nio'₂ ja₁ton₅ Génesis 4:4.

† 11:5 Enoc: 'Nio'₂ ja₁ton₅ Génesis 5:18-24.

jme₃quián₃ ja₁con₂ Diú₄, tion₅₄ 'nió'₅ le₃'éin₂ de'₂ a₂chan₂ Diú₄, ján₃ bá₄ 'nió'₅ le₃'éin₂ a₂quí₅ Diú₄ 'lian'₅₄ jui₁lia'₂ i₂'nau'₂ a₂dsen₅₄ dsí₅.

⁷ Të₂le₃ a₂'én₂ bá₄ Noé,[‡] lia'₂ con'₂ jme₁ca₂jmo₃ Diú₄ jág₁ 'e₂ niog₅ lé₂, jui₁lia'₂ a₂tsá₃ jniá₂ gué₄, ca₂tón'₃ bá₄ jui₅ a₂ca₂juá'₂ Diú₄, ca₂jmo₃ bá₄ ni₁barco ja₁lióin₃ le₂jio₅ dsa₂ dsi₂néi₂ quián₅ né₃. Jaun₂ le₂në₅ në₂jag₄ bá₄ a₂ca₂qui₃dsi₂₃ 'éi'₃ ja₁con₂ dsa₂ mi₂güüg₃, jaun₂ le₂në₅ bá₄ ca₂tíin₂ a₂lió₂ Diú₄ co₂'nió'₄ dsa₂ dsen₃, të₂le₃ a₂'éin₂ bá₄ ján₃.

⁸ Të₂le₃ a₂'én₂ Abraham,[§] lia'₂ con'₂ jme₁ca₂të₃ Diú₄, ca₂nág₂ bá₄. Ca₂₀₃'íin₃ ca₂'í₃ jui₅ a₂dsó₃ ja₁juá'₂ Diú₄ cuë₃ caun₂ 'uë₃ a₂ca₂tíin₂ lé₂ quió'₅. Ca₂₀₃'íin₃ 'uë₃ go₅₄ të₃ tsá₃ ŋi₅ a₂já'₄ ŋó₃.

⁹ Uig₅₄ ia₁ a₂jme₁'éin₂, ca₂guá₂ gua'₅₄ 'uë₃ a₂ca₂juá'₂ Diú₄ cuë₃, co₂'nió'₄ a₂líin₅ dsi₂nau₂jë₄ 'uë₃ siá'₂. Ca₂guá₂ tsi₁'né₅ a₂lé₅ quian'₅₄ tsi₁'mi'₂; ján₃ bá₄ le₂jaun₂ ca₂jmo₃ Isaac quian'₅₄ Jacob né₃, ia₁ ján₃ bá₄ ca₂tíin₂ le₂jio₅ quian'₅₄ 'éi₂ a₂jme₁ca₂juá'₂ Diú₄ cuë₃.

¹⁰ Ia₁ jme₁chi₁jñia₅ Abraham juig₂ ciudad jaun₂ a₂chí'₅ tiá₂, 'uig₅₄ ia₁ Diú₄ bá₄ i₂ca₂'náu'₃ dsí₅ jmo₃, ján₃ bá₄ i₂ca₂j móg'₃.

¹¹ Ján₃ bá₄ të₂le₃ a₂'én₂ 'ñiog₅ Sara,^{*} të₃ ma₂guein'₂ a₂le₃chan₂ guein₂ quián₅, ca₂gue₃ bá₄ jui₅bí₂ a₂léin₂ chog₅₄ guein₂ ia₁ líin₂ i₂rë₂ti'₅₄ bá₄ Diú₄ i₂ma₂cuë₃ jág₁ quió'₅.

¹² Jaun₂ né₃ Abraham, o₁jñia'₅₄ a₂ma₂i₁jóin₂, ca₂rë₃chán₃ bá₄ gué₄ tsi₁jon₂ i₂juin₅ gué₄ lín₃ jui₁lia'₂ nei₅ a₂jniá₂ guei'₅₄ mi₂güüg₃, jui₁lia'₂ mi₂tsag₄ a₂cha₂ chei'₅₄ jmi₁ñí'₄ a₂tsá₃ lé₂ le₃'í₃ dsa₂.

[‡] 11:7 Noé: 'í₂ Génesis 6 - 9. [§] 11:8 Abraham: 'í₂ Génesis 12 - 25. ^{*} 11:11 Sara: 'í₂ Génesis 18:1-15; 21:1-7.

13 Ca₂dsan₃ bá₄ le₃jín₃ 'éi₂ tē₃ tsá₃ ca₂gue₃ jui₁lia'₂ a₂jme₁ca₂juá'₂ Diú₄ cuē₃. La₁ia₁jme₁'éin₂ bá₄, jaun₂ nē₂jag₄ bá₄ a₂ca₂jág₃ tē₂ uíng₂ a₂jaun₂ a₂'éin₂, tē₅ bá₄ dsí₅ a₂ca₂jág₃. Jaun₂ le₂nē₅ bá₄ ca₂jmo₃ jág₁ a₂líin₅ dsi₂nau₂ i₂con'₂ ca₂ñi₅ mi₂güüg₃ la₂.

14 Jaun₂ jui₁lia'₂ i₂dsia₅ jág₁ le₂nē₅, jáng'₅ léi₄ a₂i₂nioi₅₄ bá₄ gué₄ a₂qui₂'no'₂ caun₂ juig₂ jē₁tiain'₃.

15 Jua'₅₄ mei'₂ gué₃ caun₂ qui₂dsau'₂ bá₄ gué₄ dsí₅ gua'₅₄ 'uē₃ ja₁ca₂'uiin₂, jme₁lé₂ bá₄ jme₁dsi₂lein₃ táng₃ ja₁jaun₂.

16 La₁ tē₂le₃ jme₁'ín₂ dsí₅ caun₂ 'uē₃ a₂dse₃ gué₄, co₂'nió'₄ a₂'ē₂₃ 'uē₃ a₂cha₂ guei'₅₄ i₂juíg₃. 'Uig₅₄ jaun₂ tsá₃ o₂guí'₃ cán₂ Diú₄ a₂quiong₅ dsa₂ Diú₄ quián₅ dsa₂ 'éi₂, ia₁ ma₂ca₂jmo₃ co₂jñia₅₄ caun₂ juig₂ ciudad quió'₅ 'éi₂.

17 Tē₂le₃ a₂'én₂ bá₄ Abraham, lia'₂ con'₂ jme₁ca₂caun₃ Diú₄ táu₂, ca₂jéin'₂ bá₄ Isaac† quiáin₅, ne₄ Diú₄. Jme₁ma₂chéin'₅ co₂jñia₅₄ a₂jme₁jñi'₃ ja₁ñi'₅₄ i₂jan₂ tan₅₄ quiáin₅, 18 o₁jñia'₅₄ jme₁ca₂juá'₂ Diú₄ cuag₃ a₂ca₂juá'₂: "Tē₂le₃ quian'₅₄ Isaac le₃chan₂ tsi₁jon₂ quiáng'₂." ‡

19 Ca₂i₃jio₅ dsí₅ Abraham, a₂'io₅ Diú₄ jui₅bí₂ a₂jme₃jein'₅₄ le₂jio₅ jin₄ 'lag₄. Jaun₂ dsón'₂ bá₄ ca₂guéin'₂ táng₃ ja₁ñi'₅₄, nē₂jag₄ bá₄ a₂ca₂jein'₅₄ táng₃ jin₄ 'lag₄.

20 Tē₂le₃ a₂'én₂ Isaac, ca₂jme₃gu'₅₄ quió'₅ Jacob quiaín'₅₄ Esaú, ca₂cuē₃ jág₁ quió'₅ a₂cuē₃ Diú₄ a₂dse₃ tē₂le₃ ne₄ jui₅ jmig₄ a₂le₃chain₂. §

21 Ján₃ bá₄ tē₂le₃ a₂'én₂ Jacob, * jme₁ma₂ja₂quián₃ jóin₂, ca₂jme₃gu'₅₄ quió'₅ le₂jan₂ le₂jan₂ chi'₂ ja₁ñi'₅₄ José. Jaun₂ ca₂jme₃juin'₂ Diú₄, a₂chéin'₅ rē₂dsiin₂ ne₄ 'ma₂'i₅₄ quió'₅.

22 Tē₂le₃ a₂'én₂ José, † lia'₂ con'₂ jme₁ma₂ja₂quián₃ jóin₂,

† 11:17 Isaac: 'í₂ Génesis 21 - 22. ‡ 11:18 Génesis 21:12. § 11:20 'í₂ Génesis 27. * 11:21 Jacob: 'í₂ Génesis 48. † 11:22 José: 'Nio'₂ ja₁ton₅ Génesis 50:24-26.

ca₂juá'₂ ca₂'iin₃ dsa₂ juig₂ Israelitas a₂'uíin₃ cang₂ gué'₄
jaun₂ 'uë₃ Egipto, jaun₂ ca₂quiog₂ 'éi'₃ 'e₂ 'nió'₅ jmo₃ dsa₂
quian'₅₄ ni₁mu₁₂.

²³ Të₂le₃ a₂'én₂ bá₄ chog₅₄-jmei₂ Moisés,
jme₁ca₂rë₃chán₃ 'éi₂, ca₂'mog₃ con'₂ 'ni₅ tsi'₂. Ia₁ ca₂jág₃
a₂'ño'₂ guein₂ 'éi₂, tsá₃ jua'₅₄ ca₂ja₃gó'₃ 'a₂ lia'₂ lé₅ 'éi'₃
quió'₅ rag₅₄ a₂jñag'₃ quió'₅. ‡

²⁴ Të₂le₃ a₂'én₂ bá₄ Moisés, § lia'₂ con₂ jme₁ma₂líin₅ dsa₂
ma₂juin'₂, tsá₃ ca₂gue₃ quiong₃ dsa₂ ja₁ñi'₅₄ quián₅ ja₁míg₄
rag₅₄ quián₅ Egipto.

²⁵ Co₂ñei'₅₄ gué'₄ ca₂'náu'₃ dsí₅ ñág₃ uig₅ quian'₅₄ dsa₂
juig₂ quián₅ Diú₄, con'₂ gué'₄ a₂le₃chain₂ o₂'ñi₃ó₃ dsí₅ ca₂tiá₂
a₂'no₃ dso₄.

²⁶ 'ño₅ gué'₄ quen₅, líin₂, a₂ñág₃ uig₅ a₂të₃'o'₂ dsa₂, lia'₂
te₃'on'₂ I₂rë₂'ín₁ quián₅ Diú₄, con'₂ gué'₄ quen₅ ca₂le₃jé₃
cu₄nió₄ a₂rë₂'ma₄ 'uë₃ Egipto. Ia₁ 'liain'₅₄ a₂cuë₃ Diú₄,
co₂dsau₅ jaun₂ bá₄ ca₂jág₃.

²⁷ Të₂le₃ a₂'én₂ Moisés, ca₂o₃'íin₃ 'uë₃ Egipto,* tsá₃
ca₂rë₃gó'₅ a₂'ne₂ rag₅₄; ca₂nau₂ bá₄ tiá₂ në₂jag₄ bá₄ a₂jíin₂
Diú₄ i₂tsá₃ jniá₂.

²⁸ Të₂le₃ a₂'én₂ Moisés, ca₂jmo₃ Jmig₄ Të₂'in₅₄, †
ca₂tsáng₂ jmi₂ o₄'né₄ né₃, ia₁jaun₂ i₂niog₅ ne₄ jme₃dsiain₂₃
jui₁lia'₂ chi'₂ dsa₂ ñe'₂ i₂le₂ne₁ quián₅ dsa₂, tsá₃ téin₂
gu₂-tag₅₄ chi'₂ i₂le₂ne₁ quián₅ dsa₂ juig₂ Israel.

²⁹ Të₂le₃ a₂'én₂ dsa₂ juig₂, ca₂ñí₃ Jmi₁ñi'₄ Guéin₂, ‡ ne₄
'uë₃ quein₂. La₁ lia'₂ con'₂ jme₁'nio₃ jmo₃ le₂jaun₂ dsa₂ juig₂
Egipto, ca₂dsain₃ bá₄, ca₂'in'₃ jmig₂.

‡ 11:23 'Nio'₂ ja₁ton₅ Éxodo 2:1-10. § 11:24 Moisés: 'Í₂ Éxodo
2 - 11. * 11:27 Noé: 'Í₂ Génesis 6 - 9. † 11:28 Egipto, Jmig₄
Të₂'in₅₄: 'Í₂ Éxodo 12 - 13. ‡ 11:29 Ján₃ bá₄ chei₂ "Jmi₁ñi'₄
'Ma₂ta₅."

³⁰ Të₂le₃ a₂'én₂ bá₄ dsa₂ israelitas, ca₂lia'₂ ca₂gon₃ ni₁'ia'₂ quió'₅ juig₂ Jericó, § jme₁ma₂ca₂lë₃ i₂nioi₅₄ guio₃ jmig₄ le₃lág'₃ quió'₅.

³¹ Ján₃ bá₄ të₂le₃ a₂'én₂ 'io₅₄ Rahab* i₂jme₁'nag₅ quió'₅ né₃, tsá₃ ca₂join₃ co₂lë₅ quain'₅₄ dsa₂ i₂tsá₃ ca₂né'₂, † ia₁ ca₂guein₃ bá₄ rë₂ dsa₂ israelitas i₂jme₁i₂nio₄ tiog₅.

³² ¿'E₂ gué₄ juá'₄ jniá₂? Tsá₃ jë₄ jmig₄ jua'₅₄ juá'₄ jniá₂ a₂'ing₄ Gedeón, ‡ quian'₅₄ Barac, § Sansón, * Jefté, † David, ‡ Samuel, § quian'₅₄ dsa₂ i₂jme₁'é₂ jág₁ quián₅ Diú₄ né₃.

³³ Të₂le₃ a₂'éin₂ bá₄ ján₃, ca₂lí'₃ juig₂ siá'₂ ja₁gon₂ rag₅₄, rë₂ bá₄ ca₂qui₃dsi₂₃ 'éi'₃ né₃, ján₃ bá₄ ca₂'ió'₃ a₂ca₂jme₃'o₅₄ Diú₄ con'₂ lé₅ jág₁ a₂ca₂cuë₃ a₂jme₃'o₅₄. Ján₃ bá₄ le₂në₅ ca₂jnéi₃ i₂lin₅₄ 'o₄ dsi₂'ia'₂, ³⁴ ca₂ei₃ si₂ cau₂ ca₂jo'₅₄, qui₂ca₂lón₂ i₂lin₅₄ a₂jme₁dsiáin₃ quian'₅₄ 'o₄ ni₁tág₂ né₃. Ján₃ bá₄ le₂jaun₂ ca₂quín'₃ bí₂ dsa₂ 'uan₅₄ ca₂jme₃'uáin'₃, ján₃ bá₄ ca₂rë₃béin₂ quíin'₂ ja₁nio₅ 'nei₂, jaun₂ ca₂tió'₃ bá₄ jme₁ca₂quíin'₂ quian'₅₄ 'lióg₂ dsa₂ i₂'iog₅₄ quió'₅. ³⁵ Ján₃ bá₄ le₂në₅ chan₂ dsa₂ mí₂ ca₂guein₃ táng₃ 'lag₄ quiáin₅ jme₁ca₂jein'₅₄ táng₃. I₂sián'₂ guë'₂ qui₂ca₂jmóg'₂ dsa₂, la₁ tsá₃ ca₂gue₃ a₂lióin₂, ia₁jaun₂ tiin₅₄ a₂jein'₅₄ a₂le₃chain₂ gué₄ dse₃. ³⁶ I₂sián'₂ guë'₂ ca₂ñág₃ le₃jé₃ jág₁ qui₂ca₂jnáu'₂ dsa₂ qui₂ca₂bóg₂ dsa₂; ca₂lia'₂ ca₂'nei'₂ dsa₂ quian'₅₄ ñí₁ cadenas, ca₂to'₂ dsa₂ né'₃ 'má₃ né₃. ³⁷ I₂lin₅₄ guë'₂ ca₂dsan₃ qui₂ca₂jnáu'₂ dsa₂ cang₄, i₂sián'₂ né₃ ca₂ti₃ dsa₂ ca₂'noi₁

§ 11:30 Jericó: 'Í₂ Josué 6. * 11:31 Rahab: 'Í₂ Josué 2:1-21; 6:25; Mateo 1:5; Santiago 2:25. † 11:31 o₃, “dsa₂ i₂tsá₃ ca₂rë₃'én₂.” ‡ 11:32 Gedeón: 'Í₂ Jueces 6 - 7. § 11:32 Barac: 'Í₂ Jueces 4 - 5. * 11:32 Sansón: 'Í₂ Jueces 13 - 16. † 11:32 Jefté: 'Í₂ Jueces 11 - 12. ‡ 11:32 David: 'Í₂ 1 Samuel 16 - 31 quian'₅₄ 2 Samuel. § 11:32 Samuel: 'Í₂ 1 Samuel.

quian'⁵⁴ ηί₁ chi₁jan₁, * ca₂jme₃dsiog₅ dsa₂ quian'⁵⁴ ηi₁tág₂ né₃. Qui₂i₁nioi₁₂ i₁jnai'⁵⁴ a₂la₂-ó₃ le₁qui'² jmá'³ ni₁lo₄ já'² cha'² quian'⁵⁴ ni₁lo₄ chein₄ lau₂ né₃; tē₂ηéi₂, tsá₃ dse₃ qui₂le₁'ág₄ dsí₅, já₃ bá₄ qui₂ca₂jmóg'² dsa₂. ³⁸ Tsá₃ lé₂ le₃jua'⁵⁴ jua'⁵⁴ jme₁ca₂tín₂ dsa₂ mi₂güüg₃ le₃chan₂ dsa₂ 'éi₂ quiong'⁵⁴. Jme₁i₂nioi₅₄ 'uë₃ co₂'ηiog₅, le₂con₂ má'² né₃, né'³ cang₄ tē₂'lau₂, né'³ tau₂ a₂niog₅ né'³ 'uë₃ né₃.

³⁹ Le₃jín₃ dsa₂ 'éi₂, ca₂'ag₃ Diú₄ dse₃ 'uig⁵⁴ ia₁ a₂'éin₂, la₁ia₁ tsá₃ ca₂'ió'³ a₂jme₁ca₂juá'² Diú₄ cuë₃.

⁴⁰ Jme₁ma₂i₃jio₅ dsí₅ Diú₄ jmo₃ co₂ηia₅₄ caun₂ a₂dse₃ gué₄ quián₂ jnio₄, ia₁jaun₂ tsá₃ le₃'ηia₅ dsa₂ 'éi₂ jua'⁵⁴ tsá₃ le₃'ηiai₂₃ co₂lë₅ quian'⁵⁴ jnio₄.

12

Jín₄ jnio₄ Jesús

¹ Jaun₂ lë₃, ia₁ ηí₄ lë₃ juin₅ dsa₂ qui₂le₁lio₃ jnio₄ i₂ma₂ca₂jme₃jnia₅ a₂'éin₂, jaun₂ dsíá₁ jnio₄ cau₅ ca₂le₃jé₃ lio₅₄ a₂jmo₅ jnág₅ quián₂, já₃ bá₄ le₂në₅ jui₁lia'² dso₄ a₂qui₂nio₅ jnio₄ né₃, jaun₂ dsau₅₄ jnio₄ ne₄ jui₅ a₂juin'² dsí₅, në₂jag₄ bá₄ a₂i₂nio₄ co₂chi'⁵⁴ a₂tián'⁵ já₃g₁ rin'⁵⁴.

² Jaun₂ né₃, né₄ jnio₄ Jesús, i₂ca₂niá₃ jui₅ a₂'éin₂ jnio₄, já₃ bá₄ i₂jme₂'ηia₅ a₂'éin₂ jnio₄. Ca₂jmo₃ 'éi₂ tió'³ dsí₅ ne₄ cróg₄, tsá₃ ca₂tón'³ jui₅ a₂o₂guí'³ a₂ca₂can₃, ia₁ jme₁ma₂ηi₅ bá₄ a₂cán₂ o₂'ηi₃ dsí₅ a₂'io'² jén'⁵ cang₂ gué₄ jaun₂. Jaun₂ né₃, ca₂guá₂ tē₂le₃ gu₂ ne₁ ne₄ta₁ quió'⁵ Diú₄.

³ 'Nió'² 'nia'² 'au'² jaun₂, 'a₂ lia'² ca₂jmo₃ Jesús: ca₂jmo₃ tió'³ dsí₅ mi'⁵⁴ a₂ca₂dsia₃ dsa₂ i₂qui₂rë₂cán'⁴ dso₄,

* 11:37 A₂lín₅₄ chog₅₄ si₂ chi₁ton₅ já₃: “ca₂can₃ dsa₂ táu₂.”

ja₁coin₂, ia₁ con'₂ tsá₃ ηó₅ nē₁jua'₂ ca₂'ong'₃ 'nia'₂, ca₂lia'₂
ca₂'uáng'₂.

⁴ Ia₁ tsá₃ gué₄ 'ein₂ ma₂qui₂ca₂quín'₂ 'nia'₂ ca₂lia'₂
ca₂tang₂ jmi₂ 'an'₅₄ 'nia'₂ quian'₅₄ mi'₅₄ a₂jmo'₂ quian'₅₄
dsáu₁.

⁵ Jaun₂ ma₂ca₂'en₃ bá₄ 'au'₂ 'nia'₂ jág₁ a₂ma₂chi₂ca₂léi'₁
Diú₄ jui₁lia'₂ jan₂ chi'₂-guein₂ quiáin₅. Le₂la₂juá'₂ ne₄ Si₂:
Tsá₃ lē₁o₁le₅₄, jón₃,
jua'₅₄ tsá₃ ton'₅₄ 'ne₂ jui₅
jme₁chei'₅ Te₁gui'₅₄ caun₂ jui₅ dse₃,
on₃ gué'₂ tsá₃ lē₁o₁'ag₅₄ i₁tín₄ 'au'₂
jme₁cuē₂₃ uig₅.

⁶ Ia₁ jme₂rē₃ Te₁gui'₅₄ jui₅
quió'₅ jui₁lia'₂ i₂'nioi₃,
ján₃ bá₄ cuē₂₃ uig₅ quió'₅ ca₂le₃jín₃ i₂guein₂₃
jui₁lia'₂ jan₂ chi'₂-guein₂ quiáin₅.*

⁷ Tiang'₃ 'nia'₂ jmo₄ ca₂le₃jé₃ uig₅ a₂ηag'₅₄, ia₁ le₂jaun₂
jme₂tag₅ Diú₄ jme₂tīn₂₃ 'nia'₂ ju₁lia'₂ jan₂ chi'₂-guein₂
quiáin₅. ¿'Ein₂ bá₄ ja₁ηi'₅₄ chan₂ i₂tsá₃ jme₂tag₅ jmei₂?

⁸ Chei'₅ Diú₄ caun₂ jui₅ rē₂ chein'₂₃ ca₂le₃jín₃ chi'₂-guein₂
quiáin₅. Jaun₂ né₃, jua'₅₄ mei'₂ gué₃ Diú₄ tsá₃ chein'₂₃ 'nia'₂
caun₂ jui₅ dse₃, tsá₃ lé₂ le₃jua'₅₄ a₂lín'₅ 'nia'₂ chi'₂-guein₂
quiáin₅ tē₃dsón'₂, jnia'₅₄ lia'₂ a₂jaun₂ bá₄ lín'₅ 'nia'₂ jui₁lia'₂
jan₂ chi'₂-guein₂ i₂lē₁ca₂rē₃chán₃.

⁹ Ján₃ bá₄ le₂jaun₂ jniog₄ né₃, lia'₂ con'₂ jme₁lág₄ jniog₄
guein₂, jme₁tē₂jí₂ chog₅₄-jmei₂ jniog₄ i₂chan₂ gua'₅₄ 'uē₃.
Jaun₂ jme₁jme₂gain₃ bá₄ jniog₄ né₃. ¿Tsa₁ dse₃ né₁ jniog₄
gau₂ ja₁con₂ Diú₄? Tē₂le₃ 'ē₂ gué₄ 'nió'₅ jme₁gan₃ bá₄ jniog₄
Diú₄ Jmei₂ jniog₄ tē₂le₃ quió'₅ jme₂dsí₂, ia₁jaun₂ le₂nē₅ bá₄
le₃chong₂.

* 12:6 Proverbios 3:11-12.

¹⁰ Jme₁ca₂cuë₃ ca₂tiá₂ uig₅ chog₅₄-jmei₂ jniog₄ i₂chan₂ gua'₅₄ 'uë₃, lia'₂ con'₂ lé₅ ca₂i₃jio₅ dsí₅ a₂dse₃. La₁ia₁ Diú₄ né₃ cuë₂₃ jniog₄ uig₅ a₂dse₃ quián₂ jniog₄ guio₅₄, ia₁jaun₂ quein'₅₄ jniog₄ a₂jñi₅ a₂lín₅ 'éi₂.

¹¹ Dsón'₂ bá₄ jaun₂, lia'₂ 'i₁caun₂ uig₅ tsá₃ tē₅ dsí₅ jniog₄, tē₂le₃ 'ñio₅ uig₅ bá₄ lág₂ jniog₄. La₁ia₁ cang₂ gué₄ jaun₂, jui₁lia'₂ i₂rē₂tín₂ tē₂le₃ quian'₅₄ uig₅ a₂ñág₅, nē₂jag₄ bá₄ caun₂ ni₁'ma₂ a₂le₁'ág₄ mí₂dse₃, léi₄ bá₄ rē₂jniá₂ tē₂le₃ 'a₂ lia'₂ dse₃ chain₂ 'ei₅ tei₄ dsí₅.

A₂go'₂ a₂tí₁ dsa₂ jág₁ quió'₅ Diú₄

¹² 'Uig₅₄ jaun₂ chog'₅₄ 'nia'₂ táng₃ gog'₂ a₂qui₂le₁ta'₅₄, ján₃ bá₄ chí'₁ táng₃ 'nia'₂ tiá₂ mi₂jne'₅₄ a₂jlen₅.

¹³ “Jmo₄ 'nia'₂ caun₂ jui₅ dsau₅ quió'₅ mi₂tag'₅₄ guiong'₅₄,”† ia₁jaun₂ tsá₃ 'e₂ qui₃nió₃ i₂sián'₂ jui₁lia'₂ i₂guián'₅₄, tē₂le₃ 'lóin₂ bá₄.

¹⁴ Quen'₂ 'nia'₂ bí₂ a₂i₁nio'₄ 'nia'₂ 'ei₅ tei₄ quian'₅₄ ca₂le₃jín₃, a₂le₃chan'₂ 'nia'₂ jñi₅ né₃. Ia₁ ca₂lia'₂ 'i₁jan₂ tsá₃ lé₂ le₃jín₃ Te₁gui'₅₄ nē₁jua'₂ tsá₃ jñi₅.

¹⁵ Quion₂ 'nia'₂ 'í₁ ia₁jaun₂ ca₂lia'₂ 'i₁jan₂ jua'₅₄ a₂tsá₃ tñin₃ a₂jme₃gu'₅₄ Diú₄ a₂'ua₁ dsí₅, ia₁jaun₂ tsá₃ 'iá₃ jin'₄ 'nia'₂ co₂'nió'₄ caun₂ tsin₅ ni₁nau₂ dsi'₃ jmo₅ jan₂ i₂quian₅ o₂me'₅₄ dsí₅ jmo₅ dain₅₄ a₂rē₂'lín'₅₄ juin₅.

¹⁶ Jmo₄ 'nia'₂ 'í₁ ia₁jaun₂ tsá₃ 'ein₂ 'nia'₂ i₃nio₄ lia'₂ con'₂ lé₅ mi₅ ni₁ñi₁₂, on₃ gué'₂ i₃nioi₅₄ jua'₅₄ a₂tsá₃ tón'₂ jui₅ jág₁ quió'₅ Diú₄. Le₂nē₅ bá₄ ca₂jmo₃ Esaú.‡ O₄quió'₄ caun₂ má₃ bá₄ ca₂'nag₃ ca₂le₃jé₃ a₂jme₁ca₂tñin₂ a₂lín₅ chi'₂ dsa₂ ñe'₂ i₂ne₅₄.

¹⁷ Ma₂ñi'₅₄ bá₄ 'nia'₂, cang₂ gué₄ jaun₂ lia'₂ con'₂ jme₁'nio₃ táng₃ Esaú gue₃ a₂jme₁ca₂tñin₂, a₂jme₃gu'₅₄

† 12:13 Proverbios 4:26. ‡ 12:16 Esaú: 'í₂ Génesis 25:27-34.

jmei₂, tsá₃ ca₂guéi'₂ jmei₂. Jaun₂ né₃, tsá₃ ma₃ca₂dsó'₂ 'a₂ lia'₂ tíin'₄ táng₃ jui₁lia'₂ a₂jme₁ca₂tíin₂, o₁jñia'₅₄ ca₂'náu'₃ 'ñio₅ lín₃ ca₂le₃jé₃ ca₂'o₃.

¹⁸ Quion₂ 'nia'₂ 'í₁ jaun₂ né₃, ia₁ on₃jua'₅₄ a₂ma₂ca₂jme₁quián'₄ 'nia'₂ má'₂ ñei₅ jaun₂ a₂jniá₂, a₂cau₂ quian'₅₄ si₂, ja₁lé₄ qui₁né'₃ 'ei₅ nei₂, dsí₂ né₃, qui₃lé₂ gau₂ 'ñio₅ lín₃.

¹⁹ On₃ gué'₂ ca₂nei'₂ 'nia'₂ a₂i₂'ein₅₄ ñí₁ trompeta, on₃ gué'₂ jág₁ quió'₅ Diú₄ a₂juá'₂ jág₁ gau₂ tsí'₅ dsa₂ 'éi₂, ca₂lia'₂ i₂ca₂nág₂ jág₁ jaun₂ ca₂mi₃ a₂tsá₃ ma₂juá'₂ 'éi₂ jág₁.

²⁰ Ia₁ tsá₃ jme₁tió'₅ nag₃ 'éi'₃ quió'₅ Diú₄ a₂juá'₂: “Ñe₁jua'₂ jan₂ já'₂ ca₂'ë₃ má'₂ jaun₂, 'nió'₅ jóin₂ qui₃dsag₅ dsa₂ cang₄.”§

²¹ 'Uig₅₄ ia₁ a₂ñí₄ lé₃ gau₂ a₂jniá₂ ja₁jaun₂, ca₂lia'₂ ñiog₅ Moisés ca₂juá'₂, “'ñio₅ lín₃ jlen₅ jniá₂ a₂gó₅.”*

²² La₁ia₁ 'nia'₂ né₃, ma₂ca₂jme₁quián'₄ Má'₂ Sión, co₂'nió'₄ Jerusalén a₂ñiog₅ guei'₅₄ i₂juí₃, ciudad quió'₅ Diú₄ jén'₃. Ma₂ca₂jme₁quián'₄ 'nia'₂ ja₁con₂ 'lióng₂ lín₃ mei₅ ángeles i₂ñi'₂ jmo₂₃ 'io'₂.

²³ Ma₂ca₂jme₁quián'₄ 'nia'₂ ja₁con₂ dsa₂ i₂tion'₅₄ lo'₂ a₂jme₃juin'₂ Diú₄, quian'₅₄ ca₂le₃jín₃ chi'₂-guein₂ quián₅ Diú₄ i₂ca₂tín₂ ca₂le₃jé₃ lia'₂ jë₁ca₂tín₂ ja₁ñi'₅₄ i₂ne₅₄, i₂ma₂qui₂le₁ton₅ guei'₅₄ i₂juí₃. Ma₂ca₂jme₁quián'₄ 'nia'₂ ja₁con₂ Diú₄ i₂qui₃dsi₅ 'éi'₃ quió'₅ ca₂le₃jín₃, ja₁con₂ jme₂dsí₂ quió'₅ dsa₂ dsen₃ i₂ma₂qui₂le₁'ña₅, ²⁴ quian'₅₄ ja₁con₂ Jesús i₂chén'₅ ne₄ jág₁ 'mí₂ a₂lí'₅₄ quian'₅₄ Diú₄, quian'₅₄ ja₁con₂ jmi₂ a₂rë₃séi₂, a₂quen₅ gué₄ a₂jáng'₅ léi₄ a₂'ua₁ dsí₅ con'₂ gué₄ quen₅ jmi₄ Abel.

§ 12:20 Éxodo 19:12-13. * 12:21 Deuteronomio 9:19.

²⁵ Jmo₄ 'nia'₂ 'í₁ a₂tsá₃ jmó'₂ 'nia'₂ jua'₅₄ tsá₃ guén'₄ 'nia'₂ Diú₄ i₂juá'₂ tsá₅ jniog₄. Ia₁ chi₂jua'₂ tsá₃ ca₂lón₂ jui₁lia'₂ i₂tsá₃ ca₂guén'₂ i₂'éi₂ i₂ca₂'é₂ jág₁ gua'₅₄ 'uë₃ la₂, 'ë₂ gué₄ bá₄ jniog₄ tsá₃ lé₂ le₃lió₂, në₁jua'₂ tsá₃ ca₂guén₄ jniog₄ i₂juá'₂ të₂ guei'₅₄ i₂juí₃.

²⁶ Jmíg₄ jaun₂, ca₂i₁bi₅₄ 'uë₃ jme₁ca₂juá'₂ Diú₄. La₁ia₁ rë₂né₃ né₃, ma₂cuë₃ jág₁ quió'₅, a₂juá'₂: “jmo₅₄ gué₄ jniá₂ con'₂ siá'₂ a₂dsi₃bi₅₄, la₁ia₁ on₃jua'₅₄ jmá'₃ gua'₅₄ 'uë₃, le₂jio₅ guei'₅₄ dsi₂güig₂ bá₄ ján₃.”†

²⁷ Jui₁lia'₂ a₂juá'₂, “con'₂ siá'₂”, dsi₂jein₃ jág₁ a₂jniá'₂ ca₂le₃jé₃ a₂jniá₂ a₂dsi₂bi₅₄ a₂lé₂ qui₂le₃jñia'₃, ia₁jaun₂ të₃gua₄ co₂tan₅₄ a₂tsá₃ lé₂ dsi₃bi₅₄, on₃ guë'₂ lé₂ le₃jñia'₃.

²⁸ Jaun₂ 'uig₅₄ ia₁ a₂tsá₃ ma₃lé₂ qui₂dsi₃bi₅₄ ja₁gon₂ Diú₄, ja₁cuë₃ jniog₄, jaun₂ cuë'₅₄ jniog₄ ti₁'mag'₄ jaun₂ né₃, o₄quió'₄ ca₂le₃jé₃ a₂la₂, jme₁ti₁ jniog₄ ne₄ Diú₄ né₃ 'a₂ lia'₂ 'ñio₂ dsí₅, jme₁'nió₄ jniog₄ Diú₄ a₂'ei₅ gau₂ dsi₅ jniog₄.

²⁹ Ia₁ lín₅ Diú₄ quián₂ jniog₄ lia'₂ lé₅ caun₂ si₂ a₂'éin₂ le₃jé₃.‡

13

'A₂ lia'₂ jmo₃ a₂të₅ dsí₅ Diú₄

¹ Tsá₃ lë₁tí₅ 'nia'₂ a₂'nióg'₃ le₂jang'₂ le₂jang'₂ jui₁lia'₂ ríng'₂ 'nia'₂.

² Tsá₃ jui₁dsi₂'én₂ 'au'₂ 'nia'₂ a₂guéng'₄ dsi₂néi₂ quiáng'₂ jui₁lia'₂ dsa₂ i₂chan₂ ja₁siá'₂, ia₁ le₂në₅ bá₄ ma₂jmo₃ i₂lín₅₄ ma₂ca₂guein₃ ángeles të₃ tsá₃ lí'₄.

³ Dsau'₂ 'au'₂ 'nia'₂ jmo₄, jui₁lia'₂ dsa₂ i₂tion'₅₄ né'₃ 'má₃, në₂jag₄ bá₄ a₂tion'₅₄ 'nia'₂ guiong'₅₄ co₂lë₅ quiaín'₅₄. 'Nio'₂

† 12:26 Haggeo 2:6. ‡ 12:29 Deuteronomio 4:24.

'au'₂ jui₁lia'₂ i₂ŋ₄ lë₃ qui₂ma₂j₂móg'₂ dsa₂, ia₁ ján₃ bá₄ dsa₂
chi₁dsán'₃ bá₄ 'nia'₂ i₂lé₂ le₃ŋág₃ uig₅.

⁴Jui₁jme₂gó'₃ bá₄ le₃jín₃ jui₁lia'₂ a₂jén'₂ dsa₂ gu₂, ján₃ bá₄
jui₁le₅₄ bá₄ 'í₁ jui₁lia'₂ ja₁tian'₃ dsi₂i₂gu₂ co₂lë₅, ia₁ qui₃dsi₅
bá₄ Diú₄ 'éi'₃ ja₁con₂ dsa₂ i₂qui₂'no₅ dso₄, jui₁lia'₂ i₂nió'₅
jág₁ quian'₅₄ i₂sián'₂ on₃jua'₅₄ dsi₂i₂gu₂.

⁵Tsá₃ jui₁chan'₂ 'nia'₂ a₂qui₂chi₁'ŋeg'₁ 'nia'₂ jua'₅₄ a₂ŋ₄
lë₃ 'ín₅ 'au'₂ 'nia'₂ cu₄. Dsá₅ 'au'₂ 'nia'₂ jmo₄ lia'₂ con'₂ tí₅
a₂cha₂ quián'₂ 'nia'₂, ia₁ ma₂ca₂juá'₂ Diú₄:

lia'₂ o₁lí₂ jmi₄ tsá₃ tón₂ jniá₂ 'nia'₂,
on₃ guë'₂ tén₄ jniá₂ 'nia'₂.*

⁶Jaun₂ né₃ lé₂ le₃jua'₅₄ a₂ma₂'ei₅ caun₂ dsi₅:
Te₁gui'₅₄ bá₄ i₂jme₂'o₅₄ jniá₂;
tsá₃ gó₅ jui₁lia'₂ 'e₂ lé₂ le₃j₂móg'₂
dsa₂ mi₂güí₃.†

⁷Dsá₂ 'au'₂ 'nia'₂ jmo₄, jui₁lia'₂ dsa₂ i₂ma₂jio₃ ne₄ jui₅,
i₂ma₂juá'₂ jág₁ quió'₅ Diú₄ ca₂tsí'₃ 'nia'₂. Quion₄ 'nia'₂ 'í₁
'a₂ lia'₂ lé₅ ca₂dsióg₃ jui₅ a₂chan₂ dsa₂ 'éi₂, jaun₂ 'én'₄ 'nia'₂
jui₅ jaun₂ jui₁lia'₂ 'én₂ 'éi₂.

⁸Lia'₂ ma₂lín₅ jaun₂ bá₄ Jesucristo, dsióg₂, jmi₄ në₃, lia'₂
con'₂ tan₅₄ bá₄ lín₅.

⁹Tsá₃ lë₁cuë'₂ 'nia'₂ jmi₄ jua'₅₄ jio₃ i₂sián'₂ i₂jme₂tag₅
'lióng₂ ne₅₄ juá'₅ siá'₂, a₂tsá₃ lé₅ con'₂ lé₅ juá'₂ jág₁ quió'₅
Diú₄. Co₂ŋei'₅₄ gué₄ dse₃ a₂gue₃ tē₂dsi₅ jnio₄ jui₅bí₂ tē₂le₃
quian'₅₄ a₂'ua₁ dsí₅ Diú₄, con'₂ gué₄ tē₂le₃ quian'₅₄ 'éi'₃
jui₁lia'₂ 'a₂ lia'₂ 'nió'₅ gué'₃ dsa₂. Ia₁ tsá₃ ta₁ tí₄ 'éi'₃ jaun₂
jua'₅₄ a₂jme₃'o₅₄ quió'₅ jui₁lia'₂ dsa₂ i₂i₂nio₄ le₂jaun₂.

¹⁰La₁ia₁ cha₂ bá₄ caun₂ ne₄chei₂ quián₂ jnio₄ ja₁tsá₃
ca₂tín₂ gué'₃ jui₁lia'₂ i₂jme₂ti₃ ta₁ guá'₅ tabernáculo.

* 13:5 Deuteronomio 31:6. † 13:6 Salmó 118:6-7.

11 Ia₁ ne₄ bá₄ jniog₄, a₂dsi₂can₅ jme₂dsa₂ dsen₅₄ jmi₄ já'₂ dsi₂néi₂ ja₁jñi₅ lin₃ gué₄, a₂jén'₄ o₄ quió'₄ dsáu₁ dsa₂. La₁ia₁ ni₁ñi₄ já'₂ 'éi₂ qui₂dsí'₂ dsa₂ 'ni'₂ ja₁tián'₄ dsa₂ juig₂ Israel.

12 Ján₃ bá₄ le₂jaun₂ ca₂ñág₃ Jesús uig₅ 'ni'₂ juig₂, ia₁jaun₂ qui₂jme₃jñi₃ dsa₂ juig₂ quiáin₅ të₂le₃ quian'₅₄ jmi₄ 'ñiog₅.

13 Dsi₁náu₄ jniog₄ jaun₂ né₃ ja₁con₂ Jesús, co₂'nió'₄ cau₅ ja₁tión₂ dsa₂ juig₂ Israel, a₂quian₂ jniog₄ o₂guí'₃ o₄quió'₄ Jesús.

14 Ia₁ mi₂güig₃ la₂, 'i₁caun₂ juig₂ tsá₃ cha₂ quián₂ jniog₄ jua'₅₄ a₂jioig₅ co₂tan₅₄, la₁ a₂jaun₂ bá₄ 'niog'₂ jniog₄ ciudad jaun₂ a₂në₃ gué₄ jiá₃.

15 Të₂le₃ quian'₅₄ Jesucristo jaun₂ né₃, ma₃ jme₁juin'₂ jniog₄ Diú₄ co₂tan₅₄, co₂'nió'₄ a₂jen'₄ jniog₄ ne₄ 'éi₂ jág₁ a₂'uë'₂ mi₂'o₄ jniog₄ con'₂ dsi₂ten₅₄ jmo₃ dsa₂ i₂tión₂ le₃quió'₅ 'éi₂.

16 Ján₃ bá₄ tsá₃ o₁ló₄ dsi₂'én₂ 'au'₂ 'nia'₂ a₂dse₃ a₂qui₁cuë'₅₄ 'nia'₂ ca₂la₂ ríng'₂, 'e₂ a₂cha₂ quiáng'₂. Ia₁ jui₁lia'₂ a₂jen'₅₄ 'nia'₂ le₂jaun₂ bá₄ a₂të₅ dsí₅ Diú₄.

17 Né'₂ 'nia'₂ jmo₄ ja₁con₂ jui₁lia'₂ i₂quian₅ ne₄ jui₅, jme₁gan₃ 'nia'₂ 'éi₂. Ia₁ jmo₂₃ 'í₁ jme₂dsí₂ quián'₂ 'nia'₂, a₂líin₅ dsa₂ i₂ca₂tín₂ dsi₃jang'₅₄ cuenta ja₁con₂ Diú₄. Jui₁le₅₄ bá₄ dse₃ ta₁ a₂niog₅ gu₂ 'éi₂ ia₁jaun₂ jmo₃ 'io'₂, on₃jua'₅₄ 'lia'₂ dsí₅, ia₁ tsá₃ ta₁ tí₄ ja₁con'₂ 'nia'₂ në₁jua'₂ le₂jaun₂ ca₂'lia'₂ dsí₅.

18 Chi₁len'₄ 'nia'₂ Diú₄ o₄quián₂ jnia'₅₄, ia₁ caun₂ bá₄ 'ei₅ dsi₅jnia'₅₄ a₂qui₂le₁jé₃ jme₂dsí₂ quián₂, ia₁ 'niog₂ bá₄ jnia'₅₄ qui₂i₁nio₁ lia'₂ dsi₂ten₅₄ jë₄ ca₂le₃jé₃.

19 Ja₂lin₃ gué₄ dsen₅₄ mi₅ jniá₂ a₂chi₁len'₄ 'nia'₂ Diú₄ ia₁jaun₂ lé₂ nei₅₄ a₂i₁'ú₃ táng₃ ja₁con'₂ 'nia'₂ ñi'₅₄ ta₁.

'Ág'₅ jág₁ jë₁ca₂tó'₂, cui_{in23} Diú₄

²⁰ Jui₁jmo₅₄ Diú₄ i₂jmo₅ 'ei₅ tei₄, i₂ca₂tág₃ táng₃ të₂le₃ quian'₅₄ jmi₂ a₂li'₅₄ jág₁ a₂jiog₅ co₂tan₅₄, ca₂tág₃ Te₁gui'₅₄ Jesucristo quián₂ jniog₄ ja₁jme₁rë₂'liin₅₄, dsa₂ juin'₂ 'éi₂ juig₅₄ já'₂ cha'₂, ²¹ jui₁jmo₅₄ bá₄ Diú₄ jui₁jmoi'₅₄ 'nia'₂ dsa₂ rë₂'ña₅ jë₄ ca₂le₃jë₃ a₂dse₃ ia₁jaun₂ jmó'₂ a₂'ño₂ dsí₅ 'éi₂. Já_n₃ bá₄ jui₁jmo₅₄ 'éi₂ 'e₂ 'nio₃ jmo₃ quian'₅₄ ca₂le₃jág₃ jniog₄ të₂le₃ quian'₅₄ Jesucristo. Jui₁le₂juin'₂ bá₄ 'éi₂ lia'₂ co₂tan₅₄, A₂méi₃.

²² Rin'₅₄ jniog₄, mi₅ jniá₂ quián'₂ 'nia'₂, jmo₄ bá₄ 'nia'₂ juin'₂ 'au'₂ quian'₅₄ jág₁ dse₃ la₂ a₂chi₁len'₄ jniá₂ 'nia'₂, ia₁ tsá₃ jua'₅₄ ñí₄ lë₃ 'lióng₂ jág₁ ma₂në₂táun₂ jniá₂ ne₄ si₂.

²³ Jui₁le₂ñi'₅₄ 'nia'₂ jág₁ jui₁lia'₂ rin'₅₄ jniog₄ Timoteo: ma₂dsei₅ bá₄ dsa₂ né'₃ 'má₃. Në₁jua'₂ ca₂guáin₂ ñi'₅₄ ta₁, jaun₂ jain₅₄ jniá₂ jë₁ma₂të₂ rë₁nei₅₄ jniá₂ i₁jing₁₂ 'nia'₂.

²⁴ Cui_n₅₄ 'nia'₂ Diú₄ ca₂le₃jín₃ jui₁lia'₂ i₂jiog₅ quián'₂ 'nia'₂, quian'₅₄ ca₂le₃jín₃ guë'₂ dsa₂ juig₂ quián₅ Diú₄.[‡] Rin'₅₄ jniog₄ i₂chan₂ Italia cui_n₂₃ Diú₄ 'nia'₂.

²⁵ Jui₁jme₂gu'₅₄ bá₄ Diú₄ ca₂le₃jín₃ 'nia'₂. A₂méi₃.[§] Co₂në₅.

[‡] 13:24 lit. “dsa₂ jñi₅.”
chi₁ton₅ “A₂méi₃.”

[§] 13:25 A₂lin₅₄ chog₅₄ si₂ tsá₃

Jag₁ 'mí₂ a₂ma₂li' ₅₄ quian' ₅₄ Diu₄
 New Testament in Chinantec, Tepetotutla (MX:cnt:Chinantec,
 Tepetotutla)

copyright © 1994 Wycliffe Bible Translators, Inc.

Language: Chinantec, Tepetotutla

Translation by: Wycliffe Bible Translators, Inc.

Chinanteco, Tepetotutla [cnt], Mexico

Copyright Information

© 1994, Wycliffe Bible Translators, Inc.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Chinantec, Tepetotutla

© 1994, Wycliffe Bible Translators, Inc.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-22

PDF generated using Haiola and XeLaTeX on 14 Jun 2022 from source files dated 30 Nov 2021

5c52af9e-3086-5d57-9b7e-2e495fea8899